

# Sa Xihna Ñi Carta I Tyaa Ra San Pablo Sii Ñiyivi Sino Iñi Sii ra Ndyoo Ñuu Corinto

---

**Tyaa ra Pablo minoo carta sii ñiyivi sino iñi sii ra Ndyoo ñuu Corinto**

**1** Yuhvi ra Pablo i casi ra Ndyoo sii vatyí cui minoo ra cua zatyíño tyíño ra Jesucristo. Ta vityi tyei carta ya sihin ra Sóstenes hermano yo.

<sup>2</sup>Ta zacuhun ndi sii si sii maa ndo ra cuu vehe ñuhu ra Ndyoo ñuu Corinto. Ñiyivi ra Ndyoo cuu sii ndo vityi vatyí sa ndu-íin ndo sihin ra Cristo Jesús. I casi ra Ndyoo sii ndo vatyí cuu ndo ñiyivi vaha xaan tañi tandíhi ñiyivi sa zacahnu sii ra Jesucristo nacahnu ñuu ñiyivi. Ndyaca ñaha ra sii tandíhi yo sa cuu cuenda ra.

<sup>3</sup>Sique sii ra Ndyoo Zutu yo ta sii ra Jesucristo ra ndyaca ñaha sii yo vatyí nacuhva xaan ra tumañi iñi sii ndo ta sa coo sa taxi añima ndo.

**Cuhva i saha xaan ra Ndyoo sa vaha sii ñiyivi ra ñuu Corinto**

<sup>4</sup>Tandíhi cuhva saha xein tyahvi ndyoo sii ra Ndyoo sa cuenda tandíhi ndo vatyí i saha xaan maa ra tumañi iñi sii ndo sa cuenda ra Cristo Jesús.

<sup>5</sup>Ta vityi i saha xaan ra cuhva sii ndo, ta cuu cahan ndo Tuhun ra, ta iyo xaan sa siñi tuñi sii ndo.

<sup>6</sup>Tandíhi sa i catyi ndi sihin ndo sa cuenda ra Cristo, ta i cuu si cuhva cuan sa cuenda maa ndo.

<sup>7</sup>Ta yucuan cuenda ñahñi sa cumañi sii ndo. Saha xaan maa ra Ndyoo tandíhi cuii ndatu sii ndo ñi ñi sa ndatu ndo quivi cua quisi tucu ra Jesucristo, ra ndyaca ñaha sii yo.

<sup>8</sup>Ta cua tyindyee ra sii ndo sihin tandíhi cuii cuhva, ta ma ndoyo ñuhu ndo, ta yoñi cua cuu tyaa cuatyí sata ndo quivi cua quisi ra Jesucristo.

<sup>9</sup>Zavaha ra Ndyoo cuhva catyi ra tandíhi saha. Ta maa ra cuu ra i casi sii ndo vatyí cu-íin ndo sihin ra Jesucristo zehe ra. Maa ra cuu ra ndyaca ñaha sii yo.

**Ña vaha sa coo ziin ziin ityi yo**

<sup>10</sup>Ta vityi sihin zivi ra Jesucristo, ra ndyaca ñaha sii yo, sica xein sii ndo hermano vatyí íin ñi cuu ndo, ta ma coo ziin ndo. Íin ñi cuhva caca iñi ndo. Íin ñi cuhva nacoo sa siñi tuñi sii ndo.

<sup>11</sup>Tacuan catyi sihin ndo hermano vatyi sa i nacatyi ñiyivi ra Cloé sihin vatyi iyo tizihí nu yucu ndo

<sup>12</sup>vatyi ziih ziih cahan ndo. Iyo ndo catyi ndo: “Yuhvi ndyique sii ra Pablo”, catyi ndo. Ta inga ndo catyi ndo: “Ta yuhvi ndyique sii ra Apolos.” Ta iyo ndo catyi ndo: “Ndyique sii ra Pedro.” Ta inga tucu ndo catyi ndo vatyi ndyico ndisa cuii ndo sii ra Cristo.

<sup>13</sup>Ña vaha sa cahan ndo tacuan vatyi ma cuu sa coo ziih yo vatyi iin ñi coño ñuhu ra Cristo cuu yo tatu sino iñi yo sii ra. ¿Atu yuhvi ra Pablo i sihi nu cruz sa cuenda ndo? ¿Atu i sicoo ndutya ndo sihin zivi mi? Yivi.

<sup>14</sup>Sehi tyahvi ndyoo sii ra Ndyoo vatyi ñá zacoo ndutye sii numinoo ndo, maa ñi ra Crispo sihin ra Gayo ta yoñi inga ra

<sup>15</sup>coto catyi ndo vatyi i zacoo ndutye sii ndo sihin zivi mi ta cundyico ndo sii.

<sup>16</sup>Aan, ndisa i zacoo ndutye sii ñiyivi ra Estéfanos, zoco sica iñi vatyi yoñi ca inga ra i zacoo ndutye.

<sup>17</sup>Vatyi ñá zaquisi ra Cristo sii mi sa zacoo ndutye sii ñiyivi. I tava ra tyiño sii, vatyi nacatyi tuhun ra, cuhva zacacu ra sii yo. Zoco ña quehin sihin sa siñi tuñi sa iyo ñuu ñiyivi ya coto caca iñi ñiyivi vatyi tyaqui xaan cuhva quehin, ta ma nacañi vaha iñi ñu cuhva catyi si sa cuenda cuhva i sihi ra Cristo nu cruz sa cuenda cuatyí yo.

**Sito yo vatyi vaha ca sa siñi tuñi sa iyo sii maa ra Ndyoo ta ziqui sa siñi tuñi sa iyo sii ñiyivi ñuu ñiyivi**

<sup>18</sup>Ñiyivi cua cunaa, sica iñi ñu vatyi sa tondo ñi cuu cuhva i sihi

ra Jesús nu cruz sa cuenda cuatyí yo. Zoco sa cuenda maa yo, ra i zacacu ra Ndyoo, ta tundyee iñi cuu si vatyi sihin sa sino iñi yo sii si ta cacu yo.

<sup>19</sup>Vatyi catyi Tuhun Ndyoo:

Sica iñi ñiyivi sa sito xaan, vatyi cuu ñihi ñu cuhva ta cacu ñu.

Zoco cua zanei tandihí cuhva cuan, ta ma ñihi ñu cuhva cacu ñu sihin sa siñi tuñi maa ñu.

Tacuan catyi Tuhun Ndyoo.

<sup>20</sup>Ñahñi maa tyindyee si sa cuu yo ra sito xaan a ra maestro a ra sito natuhun ziqui tyiño sa iyo ñuu ñiyivi. Tandihí sa sito xaan ñiyivi ñuu ñiyivi ya, ñahñi cuu si ityi nuu ra Ndyoo.

<sup>21</sup>Casi xaan iñi ra Ndyoo, ta ña saha ra sa coto ñiyivi sii ra sihin sa siñi tuñi ñu. Zoco i zavaha ra inga cuhva, ta cuu coto ñiyivi sii ra ta cacu ñu tatu cuiñi ñu Tuhun ra ta sino iñi ñu sii si. Ta iyo ñiyivi sica iñi ñu vatyi sa tondo ñi cuu Tuhun Ndyoo.

<sup>22</sup>Vatyi cuñi ñiyivi hebreo ndyehe ñu sa ndyityi. Ta ñu griego nanducu xaan ñu sa siñi tuñi, cuhva sica iñi ñu.

<sup>23</sup>Zoco maa yo nacatyi yo sihin ñiyivi cuhva i sihi ra Cristo nuu cruz. Cuxaan ñiyivi hebreo sihin cuhva cuan, ta sica iñi inga ñiyivi vatyi minoo sa tondo ñi cuu si.

<sup>24</sup>Zoco sa cuenda ñiyivi i casi ra Ndyoo, vazú ñiyivi hebreo a ñiyivi griego cuu ñu, zoco sito tandihí ñu vatyi sa cuenda ra Cristo ta cuu zacacu ra Ndyoo sii yo. Ta yucuan cuu cuhva zañaha maa ra Ndyoo vatyi casi xaan ca iñi maa ra.

<sup>25</sup>Sica iñi ñiyivi vatyi i zavaha maa ra Ndyoo minoo sa tondo, zoco vaha xaan ca cuhva i zavaha maa ra Ndyoo ta ziqui sa zavaha ñiyivi. Ta iyo xaan ca tundyee iñi sii maa ra Ndyoo ta ziqui sii ñiyivi.

<sup>26</sup>Ndoho hermanos, zaha vaha ndo cuenda cuhva i casi maa ra Ndyoo sii yo vatyi ña cuaha yo cuu ra casi xaan iñi sihin sa siñi tuñi sa iyo ñuu ñiyivi ya. Ña cuaha yo cuu ra ñiñi ta ra cuca ñuu ñiyivi ya.

<sup>27</sup>Zoco i casi ra Ndyoo sii yo ta cua catyi inga ñiyivi vatyi tondo xaan iyo yo. Vatyi cua cuu si ticahan nuu sii ñiyivi sa sica iñi vatyi casi xaan iñi ñu. Ta i casi ra sii yo, ra ña ñiñi ta ña cuca, vatyi cua zaha yo ticahan nuu sii ñiyivi iyo xaan cuhva sii ihya ñuu ñiyivi.

<sup>28</sup>Ta i casi ra sii ñiyivi ndyihí, ñiyivi sa ñahñi maa sa sito, ñiyivi sa ña cuu ndyehe ñiyivi sii. Tacuan i zavaha ra vatyi cua cutyiño ra sii yo, ta cua quindyaa ra sa tuhva inga ñiyivi, ñu cuu ñiyivi ñiñi vityi.

<sup>29</sup>Tacuan i zavaha ra Ndyoo, ta yofi cua catyi vatyi ra cahnu xaan cuu ra ityi nuu ra Ndyoo.

<sup>30</sup>Zoco zuun ñi maa ra Ndyoo cuu ra sa zandu-ñin sii maa ndo sihin ra Cristo Jesús. I saha maa ra Ndyoo vatyi cuu ra Jesús sa siñi tuñi vaha sii yo. Sihi ra Jesús, ta tyiyahvi ra sa cuenda tandihi cuatyí yo. Sa cuenda ra Cristo, ta ñahñi ca cuatyí yo ityi nuu ra Ndyoo. I zanduvaha ra cuhva iyo yo.

<sup>31</sup>Tacuan i zavaha ra Ndyoo, ta i cuu si cuhva catyi Tuhun Ndyoo: “Tatu iyo minoo ra cuñi ra catyi ra vatyi vaha xaan ra, ma cuu. ñin ñi

sii maa ra Ndyoo zacahnu yo vatyi i zavaha maa ra tandihi.”

### **Cuhva nacatyi ra Pablo cuhva i sihi ra Jesús nuu cruz**

**2** Hermanos, quivi sa sehin nu yucu ndo ta nacatyi Tuhun Ndyoo sihin ndo. Ñá cahan xein tuhun nahnu, ta ñá quehin sihin cuhva iyo sa siñi tuñi ihya ñuu ñiyivi.

<sup>2</sup>Ñá quehin inga cuhva nu yucu ndo, maa ñi cuhva i sihi ra Cristo nuu cruz sa cuenda cuatyí maa yo vatyi maa ñi cuhva cuan cuu sa cuñi quehin sihin ndo.

<sup>3</sup>Ta quivi i sei nu yucu ndo, i yuhu xein quehin sihin ndo ndya cuhva nehi.

<sup>4</sup>Ta ndoo xaan i nacatyi Tuhun Ndyoo sihin ndo. Ñá nazaque cuaha tuhun nahnu a tuhun tañi sa sito ra tuhva xaan cahan. Ñahñi. Zoco i ndyehe ndo vatyi i quehin sihin tundyee iñi sa iyo sii Tatyí Ii maa ra Ndyoo, ta sicoo xaan cuhva sihin tuhun quehin.

<sup>5</sup>Tacuan i quehin vatyi cuñi sa cua sino iñi ndo sa cuenda cuhva sa iyo sii maa ra Ndyoo ta yivi sa vatyi tyaqui xaan quehin a vatyi i quehin sihin sa siñi tuñi sa iyo ñuu ñiyivi ya.

### **Sihin Tatyí Ii maa ra Ndyoo ta zañaha ra Ndyoo sii ra sii yo**

<sup>6</sup>Zoco cahan ndi sihin minoo cuhva vaha xaan sihin ñiyivi sa naha sino iñi. Zoco sa siñi tuñi sa cuenda maa ra Ndyoo cuu si ta yivi sa siñi tuñi sa iyo cuenda ñuu ñiyivi ya a sa cuenda sa iyo sii ra ndyaca

ñaha ñuu ñiyivi ya vatyí cuee ca ta cua naa tyiño sii tandihí ra.

<sup>7</sup>Zoco cahan ndi sihin sa siñi tuñi sa saha maa ra Ndyoo. Nacatyí ndi cuhva i tyaa ra Ndyoo cuhva cumañi ca sino ñuu ñiyivi vatyí cua zanduu ra sii yo tañi maa ra. Xehe xaan i cuu tuhun ya ta sa naha, zoco vityí cuu coto yo sii si.

<sup>8</sup>Yoñi numinoo ra ndyaca ñaha ñuu ñiyivi ya ta i cutuñi iñi ra tuhun ya vatyí tatu cutuñi iñi ra, ma cahñi ra sii ra ndyaca ñaha sii yo nuu cruz. Ta ra cahnu ca cuu ra ndyaca ñaha sii yo.

<sup>9</sup>Catyí Tuhun Ndyoo:

Yoñi maa sa ndyehe a sa siñi a sa cutuñi iñi tandihí sa vaha xaan sa zanduvaha ra Ndyoo sa cuenda ñiyivi cuñi xaan sii ra. Catyí si.

<sup>10</sup>Zoco vityí sa cuenda Tatyí Ii maa ra Ndyoo ta saha ra Ndyoo sa coto yo vatyí zañaha Tatyí Ii maa ra tandihí cuii sii yo ndya cuhva ndya sa xehe xaan ca ta tuhun sa tuhva xaan maa ra Ndyoo tyixehe.

<sup>11</sup>Ma cuu coto numinoo yo ñaa sa sica iñi inga yo. Zoco sito maa yo ñaa sa sica iñi yo. Ta zuun ñi cuhva cuan, sito Tatyí Ii maa ra Ndyoo tandihí sa sica iñi maa ra Ndyoo.

<sup>12</sup>Ta saha maa ra Ndyoo Tatyí Ii ra sii yo vatyí cua zacoto ra sii yo tandihí sa vaha xaan sa saha maa ra Ndyoo sii yo.

<sup>13</sup>Ta nacatyí ndi cuhva zacuaha Tatyí Ii sii ndi ta yivi sihin sa siñi tuñi sa iyo ñuu ñiyivi ya. Nacatyí ndi tuhun sa saha maa ra Ndyoo sihin maa ndo sa iyo Tatyí Ndyoo sii.

<sup>14</sup>Zoco ñiyivi ta ñihi ca Tatyí Ii ra Ndyoo, ña cuñi ñu cuiñi ñu cuhva

nacatyí Tatyí Ndyoo. Tañi sa tondo cuu si cuñi ñu vatyí ña cutuñi iñi ñu sii si. Maa ñi ñiyivi sa iyo Tatyí Ndyoo sii, ta cuu cutuñi iñi ñu.

<sup>15</sup>Zoco ra sa iyo Tatyí Ii ra Ndyoo, cutuñi iñi ra tandihí. Zoco ñiyivi ndya vaha ñi ña cutuñi iñi ñu cuhva iyo maa ra cuan.

<sup>16</sup>Catyí Tuhun Ndyoo: “Yoñi cuu cutuñi iñi ñaa sa sica iñi ra Ndyoo. Yoñi cuu zacuaha sii maa ra”, catyí si. Zoco sica iñi maa yo cuhva sica iñi ra Cristo.

### Cuhva cuñi si sa zatyíño yo tyiño ra Ndyoo

**3** Zoco hermanos i quehin sihin ndo quivi cuan tañi sa lee cuu ndo vatyí tañi sa naca cacu ndo cuhva saa ya cuu si, ta tacuan iyo ndo ndya vityí. Vatyí cumañi nduvaha cuhva iyo ndo sa ndisa cuii. Ta ñá cuu quehin sihin ndo quivi cuan tañi ñiyivi sa zatyíño Tatyí Ii maa ra Ndyoo añima.

<sup>2</sup>Tañi sa tuhva yo cuhva zicui sii sa ndyíhi tatu ta cuu ca casi si. Tacuan i quehin sihin maa ndo sihin tuhun ña yí ñi. Tañi sa lee cuu ndo cuu si vatyí ta cuu ca casi vaha ndo. Siin xaan cuhva sino iñi ndo, ta tacuu ca cutuñi iñi ndo sa siñi tuñi sii maa ra Ndyoo.

<sup>3</sup>Maa ñi ñiyivi ta sino vaha ca iñi cuu ndo ndya vityí, ta cuñi ndo cuu sii ndo tañi cuu sii inga ñiyivi, ta sahñi tahan ndo sihin minoo ndo ta sihin inga ndo. Zavaha ndo cuhva zavaha ñiyivi sa cuu cuenda ñuu ñiyivi ya, ta ña zavaha ndo tañi ñiyivi cuenda ra Ndyoo.

<sup>4</sup>Yucuan cuenda iyo ndo catyí ndo: “Yuhvi ndyique sii ra Pablo.”

Ta inga ndo catyi ndo: “Yuhvi ndyique sii ra Apolos.” Catyi ndo. Ta sihin cuhva cuan zañaha ndo vatyí ta cuahnu ca ndo sihin Tuhun Ndyoo.

<sup>5</sup>Zoco ¿yoo ra cuu yuhvi? ta ¿yoo ra cuu ra Apolos ta sahñi tahan ndo sa cuenda ndi? Maa ñi ra zacoto Tuhun Ndyoo sii ndo cuu nduhvi, ta i sino iñi ndo. Tahan tahan ndi i zavaha ndi cuhva i catyi maa ra Ndyoo sihin ndi.

<sup>6</sup>Yuhvi i tasi siti sa cuu Tuhun Ndyoo. Ta ra Apolos i quisi cozo. Ta i zacuahnu maa ra Ndyoo tyiño cuan.

<sup>7</sup>Yucuan cuenda ñahñi cuu ra tasi ta ra tyozo, zoco maa ra Ndyoo cuu ra ñiñi ca vatyí maa ra zacuahnu tyiño cuan.

<sup>8</sup>Ñiñi cuu si tatu tasi yo a tyozo yo, ta tahan tahan yo cua cuhva maa ra Ndyoo sa vaha sii yo cuhva tahan si sa cuenda tyiño yo.

<sup>9</sup>Ñiñi i zatyíño maa ndi sihin ra Ndyoo. Ta maa ndo cuu tañi minoo ñuhu nu zatyíño maa ra Ndyoo. A tañi minoo vehe zandaa ra cuu ndo.

<sup>10</sup>I catyi maa ra Ndyoo vatyí yuhvi cua cui tañi minoo ra sa sito xaan zandaa vehe. Sa i saqui cimientó si, ta inga ra zandaa vehe nuu cimientó cuan, cuñi si sa zacuenda ra cuhva zatyíño ra.

<sup>11</sup>Ta yoñi ra cuu caqui inga cimientó ta ziqui cimientó sa sa ndyaa vatyí ra Jesucristo cuu cimientó vehe cuan.

<sup>12</sup>Zoco cuu zandaa maa yo minoo vehe nuu cimientó cuan. Cuu cutyíño yo xuhun cuan a xuhun cuisí a yuu tyaqui. A cuu cutyíño yo yutu a itya a mihin.

<sup>13</sup>Ta quivi quisi ra Cristo cua ndyehe ra tyiño zacuu minoo minoo yo. Cua zaquisi ra ñúhu, ta cua ndyehe ra tatu vaha tyiño yo a ña vaha si.

<sup>14</sup>Tatu ma cayu tyiño yo sa zandaa yo nuu cimientó cuan, cua cuhva ra Ndyoo sa vaha sii yo.

<sup>15</sup>Zoco tatu cayu tyiño i zacuu minoo yo, cua ndoyo ñuhu si, ta cunaa si, zoco ra cuan, cacu ra. Sa yatyí cuii ca sa ma cacu ra tañi minoo ra quita si vehe sa cayu.

<sup>16</sup>¿Atu ña sito ndo vatyí sa tandihi maa ndo cuu vehe ñuhu ra Ndyoo ta ndyaa Tatyí Ii ra Ndyoo sihin ndo?

<sup>17</sup>Tatu zatívi minoo ra vehe ñuhu ra Ndyoo, cua zanaa ra Ndyoo sii ra cuan vatyí ii xaan vehe ñuhu ra Ndyoo, ta maa ndo cuu vehe ñuhu ra.

<sup>18</sup>Numinoo ndo ta ma zandavi ñaha ndo sii ndo. Tatu caca iñi ndo vatyí sito xaan ndo sihin sa siñi tuñi sa iyo ñuu ñiyívi ya, vaha ca zanduu ndo sii ndo tañi minoo ra sa ñahñi maa sito, ta cua cuhva ca maa ra Ndyoo sa siñi tuñi maa ra sii ndo.

<sup>19</sup>Vatyí sa siñi tuñi sa iyo ñuu ñiyívi ya, ñahñi maa cuu si ityí nuu ra Ndyoo. Sa tondo ñi cuu si sa cuenda maa ra. Vatyí catyi Tuhun Ndyoo: “Sihin sa siñi tuñi sa iyo sii ñiyívi, ta cua zanduva ra Ndyoo sii ñu.”

<sup>20</sup>Ta inga tucu cuhva catyi Tuhun Ndyoo: “Sito ra Ndyoo cuhva sica iñi minoo ra casi xaan iñi vatyí ñahñi vale si.”

<sup>21</sup>Yucuan cuenda yoñi ndo tyaa xaan ndo yahvi sii numinoo ñiyívi

vatyí sa saha maa ra Ndyoo tandíhi cuii sa cuñi si sii ndo.

<sup>22</sup>Saha maa ra Ndyoo sii yuhvi ra Pablo sii ndo, ta saha ra sii ra Apolos ta ra Pedro tucu vatyí tyindyee ndi sii ndo. Ta tandíhi cuii sa iyo ñuu ñiyivi saha ra sii ndo. Ta vazu ndito ndo a sa sihi ndo, zoco ndyaa ra sihin ndo. Ta tandíhi sa iyo vityi ta sa cua coo ityi nuu ca, tandíhi cuii ñaa sa cuu si, ta cuu si cuenda maa ndo vatyí tyindyee si sii ndo.

<sup>23</sup>Ta maa ndo cuu sii ra Cristo, ta ra Cristo cuu sii ra Ndyoo.

#### Tyiño i zavaha ra apóstol

**4** Cuñi si sa nacoto ndo sii ndi tañi ra zatyíño sa cuenda ra Cristo. Tyiño maa ndi cuu sa zacuahá ndi sii ñiyivi tuhun xehe ca sii maa ra Ndyoo.

<sup>2</sup>Ta sa cuenda maa ndi, ra cuu muzú ra Ndyoo, cuñi si vatyí tandíhi saha tyaa ndi yahvi tandíhi sa nacatyí ra Ndyoo sihin ndi.

<sup>3</sup>Ta ña sica iñi atu catyí ndo vatyí vehi a ña vehi a tatu catyí inga ñiyivi. Ñahñi sa cuu. Ta nu mi ta ma cuu catyí tatu zavehi sa vaha a sa ña vaha.

<sup>4</sup>Catyí sa siñi tuñi vehi sihin, vatyí ñahñi ca cuatyí. Zoco numaa tacuan ta ña cuñi si catyí si vatyí ñahñi maa cuatyí caña ñi. Maa ra Ndyoo cuu ra cua tyicuhva sii.

<sup>5</sup>Yucuan cuenda ma catyí ndo tatu vaha a ña vaha sa zavaha ñiyivi vatyí ta saa ca quivi. Quivi cua quisi ra Cristo ta cua zandundisi ra nu ñaa. Ta cua zatuu ra sa xehe sa iyo añima yo. Ta ziqui cua tyiyahvi ra Ndyoo sii minoo minoo yo cuhva tahan si sii yo.

<sup>6</sup>Ndoho hermanos quehin cuhva ya vatyí cua tyindyee si sii maa ndo. Naticuhva maa ra Ndyoo sii mi ta sii ra Apolos, ta ma zacahnu maa ndo cuaha ca sii minoo ndi a sii inga ndi. Ña tacuan catyí Tuhun Ndyoo.

<sup>7</sup>Yoñi minoo ndo sa ñiñi ca ta ziqui inga ndo. Tandíhi sa cuu sii ndo, maa ra Ndyoo i saha. Yucuan cuenda ma zacahnu ndo sii ndo.

<sup>8</sup>Zoco sica iñi maa ndo vatyí sito ndo tandíhi cuii sa iyo sa cuenda maa ra Ndyoo ta ñahñi sa cumañi sii ndo. Sa ndyaca ñaha ndo tañi sa rey cuu ndo, ta cuu tyaa siyo ndo sii maa ndi. Vaha xaan tatu sa ndisa vatyí rey cuu ndo, ta tacuan ta cua cuu cundyaca ñaha ndi sihin ndo.

<sup>9</sup>Ta sica iñi vatyí maa ndi, ra apóstol, i zanduluhlu xaan ca ra Ndyoo sii ndi. Ndyehé xaan ndi tundoho tañi minoo ra sa ñoho vehe caa, ta cuñi cuu ra. Tañi sa sindyaca zandaru sii ndi ityi cahnu ta ndyehé ñiyivi ta ángel sii ndi. Ta saha xaan si ticahan nuu sii ndi cuu si.

<sup>10</sup>Sa cuenda ra Cristo ta sica iñi ñiyivi vatyí tondo xaan maa ndi, zoco maa ndo sito xaan ndo cuñi ndo sa cuenda ra Cristo. Tañi sa ñahñi sa cuu zacuu maa ndi, zoco maa ndo cuu xaan sii ndo, cuñi ndo. Sacu ndyaa ñiyivi sii maa ndi, zoco sii ndoho zacahnu ñu.

<sup>11</sup>Ndya cuhva ndya vityi ta ndyehé xaan ndi tundoho. Sizoco ndi. Ityi ndi. Ñahñi ca zahma ndi. Ñahñi vehe ndi. Ta tuhva ñiyivi cañi sii ndi.

<sup>12</sup>Sitatu xaan ndi vatyí ñihi xaan zatyíño ndi. Quiñi cahan ñiyivi

sihin ndi, zoco vaha cahan ndi sihin ñu. Zavaha ñu sa ña vaha sihin ndi, zoco zandyee ndi iñi ndi.

<sup>13</sup>Cahan ñu sii ndi. Zoco vii ñi cahan ndi sihin ñu. Zaha ñu tuhun tañi mihin cuu ndi tañi sa ñahñi yahvi ndyaa ndi ndya cuhva ndya vityi.

<sup>14</sup>Na tyei cuhva ya sii ndo sa cua cucahan nuu ndo. Zoco tañi sa sehi tyiño sii zehe ndyih, ra cuñi xein.

<sup>15</sup>Vazu usi mil maestro zacuaha sii ndo sa cuenda ra Cristo, zoco ña cuaha zutu ndo. Mi cuu tañi zutu ndo sa cuenda ra Jesucristo vatyí xihna ca mi i nacatyí sihin ndo yozo caa cuu cacu añima ndo.

<sup>16</sup>Yucuan cuenda zañiñi sii ndo vatyí zavaha ndo tandihí cuhva zavehi.

<sup>17</sup>Ta yucuan cuenda tasi sii ra Timoteo nu yucu ndo. Cuñi xein sii ra tañi minoo zehi. Vaha xaan ndyico ra sii ra ndyaca ñaha sii yo. Cua zanacohon ra iñi ndo cuhva iye sa cuenda ra Cristo ta cuhva zacuehi tahan tahan vehe ñuhu.

<sup>18</sup>Iyo ndo zacahnu xaan ndo sii ndo. Sica iñi ndo vatyí ma cuhun que nu yucu ndo.

<sup>19</sup>Zoco tatu cuhva cuñi maa ra Ndyoo cuu, ña naha ca ta cua cuhin nu yucu ndo. Ta cua ndyehi sii ndoho sa zacahnu sii ndo tatu ndyizo ndo tundyee iñi maa ra Ndyoo a tuhun cahan ñi ndo.

<sup>20</sup>Vatyí tatu ndisa vatyí ndyaca ñaha ra Ndyoo sii ndo, yivi sa cahan ñi maa ndo cuu sí, zoco cua cuu zatyíño ndo sihin tundyee iñi maa ra Ndyoo.

<sup>21</sup>¿Yozo caa cuñi maa ndo? ¿Atu cuñi ndo sa quisi quehin sii ndo?

¿A cuñi ndo sa quisi zañehi sii ndo cuhva cuñi xein sii ndo ta vii ñi cua quehin sihin ndo?

**Tatu ña cuñi minoo hermano zandoo ra cuatyí ra, cuñi sí sa tava yo sii ra**

**5** Catyí ñiyivi sihin vatyí iyo minoo ra nu yucu ndo ndyaa ra sihin zihí ndahvi ra. Cahnu xaan cahnu xaan cuatyí cuan. Ndyá cuhva ndya ñiyivi ta coto ca Tuhun Ndyoo ta ña tuhva ñu zavaha sii sí.

<sup>2</sup>Sica iñi ndo vatyí vaha xaan ndo, ta ña nducuihya iñi ndo sa cuenda cuatyí cuan tañi tahan sí. Ta ña tava ndo sii ra zavaha cuhva quiñi xaan cuan.

<sup>3</sup>Ndisa yoñi ndyaa sihin ndo sihin coño ñuhi, zoco tañi sa ndyeyi sihin ndo cuu sí vatyí ñoho xaan iñi sii ndo. Ta sihin zivi ra Jesús, ra ndyaca ñaha sii yo, sa cundaa iñi cuhva cuñi sí zavaha ndo sihin ra zavaha cuatyí cuan.

<sup>4</sup>Cuñi sí sa titahan ndo. Ta zaha ndo tuhun vatyí ndyeyi sihin ndo. Ta cua coo xaan tundyee iñi ra Jesús sihin ndo.

<sup>5</sup>Ta ziqui cuhva cuenda ndo sii ra cuan sii cuihna vatyí cua cuu zativi ra sii coño ñuhu ra, ta cua cuu cacu añima ra quivi cua tasi tuñi ra Ndyoo sii ñiyivi.

<sup>6</sup>Ña vaha sa catyí ndo vatyí vaha xaan ndo vatyí saha ndo sa coo cuatyí cuan nu yucu ndo. ¿Atu ña sito ndo tuhun sa catyí sí vatyí cua ndaa pan tatu tyihi yo zuhva ñi yusa iya? (Ta tañi yusa iya cuu ra cuan. Ta coto cua nduu tandihí ndo tañi maa ra.)

<sup>7</sup>Tava ndo yusa iya ña vaha cuan coto zativi sí sii tandihí ndo.

Tacuan ta cua cuu ndo tañi pan ña ndaa vatyi ñahñi yusa iya ña vaha cuan cua quihvi ticui ndo. Ta zuun ñi maa ra Cristo cuu ra i sihi nu cruz sa cuenda yo. Ta sa naha i sahñi ñiyivi mvee ticatyi ta ndasi cuatyi ñu sihin niñi ti. Ta zuun ñi cuhva cuan i sati niñi ra Cristo nu sihi ra, ta sihin niñi cuan zandasi ra Ndyoo cuatyi yo ta zacacu ra sii yo.

<sup>8</sup>Yucuan cuenda nacuu yo ñiyivi vaha sa ndisa. Ma zavaha ca yo sa quiñi ta sa ña vaha. Zoco nazavaha yo sa vaha sa ndisa cuii ta sa ndoo.

<sup>9</sup>Nu inga carta i tasi sii ndo i catyi sihin ndo vatyi ma coo ndo sihin ñiyivi iyo cuatyi.

<sup>10</sup>Zoco ñá quehin tuhun cuan sa cuenda ñiyivi ta sino ca iñi Tuhun Ndyoo. Iyo ra zavaha ra sa quiñi sihin sa ziin ziin ñaha. Iyo ra cuñi xaan ra sa coo xaan sa sii ra. Iyo ra zuhu ra ta zandavi ñaha ra. Zoco ma cuu cuiñi siyo ndo sii tandihi ñiyivi sa iyo tacuan vatyi ndyaa ndo ñuu ñiyivi sihin ñu.

<sup>11</sup>Zoco quehin tuhun cuenda ra cuu hermano. Ma cutahan ndo sihin ra tatu zavaha ra sa quiñi sihin sa ziin ziin ñaha, a tatu cuñi xaan ra sa coo xaan sa sii ra, a tatu zacahnu ra sii inga ndyoo, a tatu quiñi cahan ra ta sahñi tahan ra sihin ñiyivi a tatu ra siñi cuu ra a ra zuhu. Ta ma casi ndo xita sihin numinoo ra zavaha minoo cuhva cuan tatu catyi ra vatyi hermano cuu ra.

<sup>12-13</sup>Vatyi maa yo ña tahan si tyaa yo cuatyi sata ñiyivi ityi sata. Cua tasi tuñi maa ra Ndyoo sii maa ñu. Zoco cuñi si sa coto vaha ndo sii

ñiyivi ndyico sii ra Ndyoo nu yucu ndo. Yucuan cuenda tava ndo sii ra iyo cuatyi cuan nu yucu ndo, ra sa quehin tuhun.

**Ma tyaa yo cuatyi sata ra hermano nuu ra cu tyiño**

**6** ¿Ñaa cuenda tuhva maa ndo tyaa cuatyi sata inga hermano nuu ra cu tyiño, ra ña sino iñi Tuhun Ndyoo? ¿Ñaa cuenda ma zandaa ndo tyiño cuan nuu tandihi hermano?

<sup>2</sup>¿Atu ña sito ndo vatyi ityi nuu ca cua tyicuhva maa yo sii ñiyivi ñuu ñiyivi? Tatu cua cuu tyicuhva ndo ñuu ñiyivi, ¿ñaa cuenda sica iñi ndo vatyi ma cuu tyicuhva ndo tyiño ndyihí vityi?

<sup>3</sup>Ityi nuu ca cua tyicuhva maa yo sii ángel. Yucuan cuenda cuu tucu tyicuhva ndo tyiño ña niñi xaan tañi sa iyo vityi.

<sup>4</sup>Tatu iyo cuatyi nu yucu ndo ¿ñaa cuenda saha ndo sa zandaa inga ñiyivi tyiño? Ñahñi ra cuu ra cuan sa cuenda maa ndo.

<sup>5</sup>Quehin cuhva ya sihin ndo vatyi cuñi sa cua cucahan nuu ndo. Zaha ndo tuhun vatyi yoñi sa iyo sa siñi tuñi vaha nu yucu ndo vatyi ña saha ndo sa zandaa ra cuan tyiño.

<sup>6</sup>Zoco sahan ndo nuu ra cu tyiño ta tyaa ndo cuatyi sata hermano ndo nuu ra ña sino iñi.

<sup>7</sup>Iyo cuatyi nu yucu ndo vatyi sahan ndo nuu ra cu tyiño sihin hermano ndo. Vaha ca zandye ndo iñi ndo sihin ñaa sa zavaha ñiyivi sihin ndo vazu zuhu ñu ndaha tyiño ndo.

<sup>8</sup>Zoco maa ndo cuu ra zavaha sa ña vaha. Ndyaa sa sii hermano ndo ta zuhu ndo.

<sup>9</sup>¿Atu ña sito ndo vatyi ma cuu quihvi ñiyivi ña vaha nu ndyaca ñaha ra Ndyoo? Ma zandavi ñaha ndo sii ndo. Ma cuu quihvi ra sa ndyaa sihin minoo ñaha ta ña tindaha ra, a ñiyivi zacahnu sii inga ndyoo, a ra ndyaa sihin inga ñaha sa yivi ñazihí ra a ra ndyaa sihin inga ra.

<sup>10</sup>Ta ma cuu quihvi ra zuhu a ñiyivi cuñi xaan sa coo sa sii ñu, a ra siñi, a ñiyivi quiñi cahan sihin inga ñiyivi. Ma cuu cuhun tandihí ñiyivi sa tacuan caa nu ndyaca ñaha ra Ndyoo.

<sup>11</sup>Ta tacuan i cuu zuhva maa ndo. Zoco i nacatya ra Ndyoo añima ndo. Sihin Tatyí Ii maa ra Ndyoo i zanduvaha ra cuhva iyo ndo. Sa cuenda sa i zavaha ra Jesucristo, ra ndyaca ñaha sii yo, ta ñahñi ca cuatyí ndo ityi nuu maa ra Ndyoo.

**Coño ñuhu maa yo cuu  
vehe ñuhu ra Ndyoo**

<sup>12</sup>Cuu zacuí ñaa sa cuñi, zoco ma tyindyee tandihí si sii. Saha ra Ndyoo sa zacuí sii si, zoco ma cuhve sa cundyaca ñaha si sii.

<sup>13</sup>Iyo sa casi yo sa cuenda sisi yo, ta sisi yo iyo sa cuenda sa casi yo. Zoco ityi nuu ca cua naa tandihí cuhva cuan cua zacuu ra Ndyoo. Zoco ña iyo coño ñuhu yo sa vatyi zavaha yo sa quiñi sihin sa ziin ziin ñaha. Coño ñuhu yo cuu sii maa ra Ndyoo. Ta cuñi maa ra cundyaca ñaha ra coño ñuhu yo sihin Tatyí Ii ra.

<sup>14</sup>I zanandoto ra Ndyoo sii ra Jesús, ta zuun ñi cuhva cuan cua zanandoto ra sii coño ñuhu yo sihin tundyee iñi maa ra.

<sup>15</sup>¿Atu ña sito ndo vatyi cuu ndo zuhva coño ñuhu ra Cristo? ¿Atu vaha tatu zandu-iin ndo coño ñuhu ra Cristo sihin minoo ñaha zana? iNuminoo saha!

<sup>16</sup>¿Atu ña sito ndo vatyi tatu zandu-iin minoo ra sii coño ñuhu ra sihin minoo ñaha zana sa nduu ñu tañi minoo ñi ñiyivi? Catyi maa ra Ndyoo sisi Tuhun ra vatyi ndyehe ra sii ñu tañi minoo ñi ñiyivi.

<sup>17</sup>Zoco ra sa ndu-iin sihin ra Cristo, sa ndu-iin añima ra sihin ra Cristo vatyi zuun ñi Tatyí Ii iyo sii nduu tahan ra.

<sup>18</sup>Zandoo ndo sii cuatyí sa cuñi ndo sii minoo ñaha sa yivi ñazihí ndo cuu. Iyo inga cuatyí sa ma zatívi xaan sii ndo. Zoco ñiyivi zavaha cuatyí ya, zuun ñi sii maa ñu zatívi ñu.

<sup>19</sup>¿Atu ña sito ndo vatyi coño ñuhu maa yo cuu vehe Tatyí Ii? Saha maa ra Ndyoo sii ra sii yo, ta iyo ra sisi añima yo. Ta yivi ca cuenda maa yo cuu yo.

<sup>20</sup>Yahvi xaan i zata maa ra Ndyoo sii yo. Yucuan cuenda zacahnu xaan ndo sii ra Ndyoo sihin coño ñuhu ndo.

**Cuhva cuñi si coo ñiyivi  
sa yaha tindaha**

**7** Ta vityi cua nacatyi sihin ndo sa cuenda cuhva i nducuu tuhun ndo sii, nuu carta i zaquisi ndo. Sa xihna ñi, sa ndisa cuu si vatyi vaha ca tatu ma tindaha ñiyivi.

<sup>2</sup>Zoco coto coo cuatyí ndo natindaha tahan tahan ndo sihin minoo ñaha ta tahan tahan ñaha sihin minoo rayii.

<sup>3</sup>Nazavaha rayii cuhva tahan si sihin ñazihí ra. Ta tacuan tucu ñaha, nazavaha ña cuhva tahan si sihin yii ña.

<sup>4</sup>Ma cuu zavaha ñaha cuan ñaa sa cuñi maa ña sihin coño ñuhu ña vatyí tahan tucu si sii yii ña catyi ra yozo caa cua zavaha ña. Ta tacuan tucu rayii, sii ñaha ra cuu tucu coño ñuhu ra.

<sup>5</sup>Ma catyi ndo vatyí ma cuu cuzu ndo sihin ñaha ndo a sihin yii ndo. Zoco tatu cuñi ndo, cuu zaña ndo sii si zuhva quívi tatu nduu tahan ndo cuñi cuhva cuan. Ta cuu coo ndyitya ndo ta cahan ndo sihin ra Ndyoo. Ta ziqui ndu-íin tucu ndo coto zandavi ñaha cuihna sii ndo ta coo cuatyí ndo vatyí ma cuu cundyaca ñaha ndo sii ndo.

<sup>6</sup>Quehin cuhva ya vatyí sehi sa tindaha ndo, zoco yívi sa zañiñi sii ndo.

<sup>7</sup>Vatyí vaha xaan tatu cuu coo tandihí ndo tañi mi. Zoco ziiñ ziiñ cuhva saha ra Ndyoo sii sa minoo minoo yo.

<sup>8</sup>Catyí sihin ñu yoco ta sihin ñundahvi vatyí vaha tatu ndoo ñu tacuan ñi tañi mi.

<sup>9</sup>Zoco tatu ma cuu cundyee iñi ñu sa ma tindaha ñu, vaha ca natindaha ñu.

<sup>10</sup>Ta sihin ñiyívi sa yaha tindaha, catyi minoo cuhva sa cuenda ra ndyaca ñaha sii yo vatyí ma zandoo ñuzihí sii yii ñu.

<sup>11</sup>Ta tatu zandoo minoo ña sii yii ña, ma cuu tindaha tucu ña sihin inga ra. Zoco cuu naco vaha ña sihin yii ña. Ta ma cuu sa sino tutu ta zandoo minoo ra sii ñazihí ra.

<sup>12</sup>Ta vityí cua quehin ziqui inga zuhva ca cuhva, ta ña site tatu catyi maa ra Ndyoo cuhva ya a maa ñi mi, zoco tyehen catyi. Tatu iyo minoo hermano ta ña sino iñi ñazihí ra, zoco cuñi ña cundyaa ña sihin ra, ma cuu sa sino tutu ta zandoo ra sii ña.

<sup>13</sup>A tatu iyo minoo hermana ta ña sino iñi yii ña, zoco cuñi ra cundyaa ra sihin ña. Ma cuu natani tutu ñu ta zandoo ña sii ra.

<sup>14</sup>Vatyí sa cuenda sa sino iñi ñazihí ra ta tyindyee tucu ra Ndyoo sii maa ra. Ta zuun ñi cuhva tyindyee ra Ndyoo sii minoo ñaha ña sino iñi tatu sino iñi yii ña. Ta sihin cuhva cuan ta nduu zehe ñu tañi zehe ñiyívi sino iñi ta yívi tañi zehe ñiyívi ña sino iñi.

<sup>15</sup>Zoco tatu zandoo, ra ña sino iñi sii ñaha ra a ñaha ña sino iñi sii yii ña, nacuhun ñu. Ta sihin cuhva cuan sa i ndasi ra hermano a ña hermana. Cuñi maa ra Ndyoo sa coo sa taxi.

<sup>16</sup>Vatyí ña siton hermana tatu cua cuu zasinon iñi yíun. Ta ña siton hermano tatu cua cuu zasinon iñi ñazihun.

<sup>17</sup>Ta tyehen catyi sihin ndo: Coo ndo cuhva catyi ra Ndyoo sihin ndo. Ta ndoo ndo vaha sihin cuhva iyo ndo quívi i cana ra Ndyoo sii ndo. Ta tacuan catyi sihin tandihí ñiyívi sino iñi ziiñ ziiñ vehe ñuhu.

<sup>18</sup>Tatu i casi ra Ndyoo sii minoo ndo ta sa yaha tahndya ñiñi xiñi xuu ndo. Ma caca xaan iñi ndo sa cuenda si. A tatu iyo ndo tañaha ca coo costumbre cuan sii ndo, ña cuñi si sa coo si vityí.

<sup>19</sup>Ñã ñiñi tatu zavaha yo costumbre cuan a ma zavaha yo sii si. Sa ñiñi cuu sa tyaa yo yahvi tuhun cahan maa ra Ndyoo.

<sup>20</sup>Ndoo ndo vaha tañi iyo ndo quivi i cana ra Ndyoo sii ndo.

<sup>21</sup>Tatu iyo patrón quivi i cana ra Ndyoo suun, ma caca iñun. Zoco tatu cuu ndasun, nducun cuhva.

<sup>22</sup>Vatyí quivi i cana ra Ndyoo sii minoo ra iyo patrón, ndisa iyo patrón ra, zoco ñã ndyaca ñaha ca cuatyí ra sii ra. Zoco ra sa yoñi patrón quivi i cana ra Ndyoo sii ra, nduu ra tañi ra iyo patrón vatyí nduu ra muzu ra Ndyoo.

<sup>23</sup>Yahvi xaan i zata ra Ndyoo sii ndo. Ma cuhva ndo sa cundyaca ñaha sa ñã vaha sii ndo. (Cuhva ndo sii ndo sii ra Ndyoo nacundyaca ñaha ra sii ndo, ta zatyíño ndo tyíño ra.)

<sup>24</sup>Catyí sihin ndo hermano vatyí ndoo ndo vaha cuhva iyo ndo quivi i cana ra Ndyoo sii ndo, ñaa ñi maa tyíño.

<sup>25</sup>Ta catyí sihin ñu yoco, ñahñi tuhun i saha ra Ndyoo sii sa cuenda ndo, zoco catyí sihin ndo cuhva sica iñi, ta cuu tiin cuenda ndo tuhun vatyí sito ndo vatyí i saha maa ra Ndyoo tumañi iñi sii, ta tuhve cahan maa ñi sa vaha sa saha maa ra sii.

<sup>26</sup>Ta sica iñi vatyí vaha ca ma tindaha ñu yoco sa vityí vatyí ndyehe xaan maa yo, ra sino iñi, tundoho sisi quivi ya.

<sup>27</sup>Zoco tatu sa iyo ñazihun, ma nducu ndo cuhva natani tutu ndo. Zoco tatu ta coo ca ñazihun, ma cuñun sa coo.

<sup>28</sup>Zoco tatu tindohon, yivi cuatyí cuu si. Ta tatu tindaha ñu yoco, yivi

cuatyí cuu si. Zoco tatu tindaha ndo cua coo xaan tizihí ta tundoho sii ndo ihya ñuu ñiyivi. Ta yucuan cuenda catyí sihin ndo vatyí vaha ca sa ma tindaha ndo vatyí ñã cuñi sa ndyehe xaan ndo tundoho ta tizihí cuan.

<sup>29</sup>Ta tyehen catyí sihin ndo hermanos vatyí ñã cuaha ca quivi ndyaa. Cuñi si vatyí ra iyo ñazihí ma quihí xaan iñi ra sii ñã vatyí cuñi si sa caca iñi ra sa cuenda tyíño ra Ndyoo tandihí saha.

<sup>30</sup>Ta tatu cuihya xaan cuñi ndo zoco ma tyaa xaan ndo yahvi sii si. Ta tatu zii cuñi ndo ma tyaa xaan ndo yahvi sii si. A tatu cuca ndo ma tyaa xaan ndo yahvi sii si, zatyíño xaan ndo tyíño ra Ndyoo.

<sup>31</sup>Ta ra sa iyo ndaha tyíño vityí, nacutyíño ra sii si sa cuenda tyíño ra Ndyoo vatyí ñuu ñiyivi sa ndyehe yo vityí sa cuñi naa si.

<sup>32</sup>Cuñi sa ma caca xaan iñi ndo sa cuenda sa iyo ñuu ñiyivi ya. Caca iñi ndo maa ñi sa cuenda tyíño ra Ndyoo. Minoo ra sa ta coo ca ñazihí, sica iñi ra sa cuenda tyíño ra Ndyoo, ta cuu zatyíño ra tyíño ra Ndyoo.

<sup>33</sup>Zoco ra sa iyo ñazihí, sica iñi ra cuhva coo vaha ra ihya ñuu ñiyivi ta cuhva cua cuzii iñi ñazihí ra.

<sup>34</sup>Ta ziiin ziiin cuhva iyo sii ñuzihí sa iyo yii ta ñu yoñi. Ñaha sa tañaha ca coo yii, sica iñi ñã sa cuenda tyíño maa ra Ndyoo. Sii ra Ndyoo cuu coño ñuhu ñã ta sa siñi tuñi sii ñã. Zoco ñaha sa iyo yii, sica iñi ñã cuhva coo sa vaha sii ñã ihya ñuu ñiyivi ta cuhva cua cuzii iñi yii ñã.

<sup>35</sup>Nacatyí cuhva ya sihin ndo vatyí cuñi tyindyeyi sii ndo. Ñã

cuñi catyi vaty ma cuu tindaha ndo. Zoco cuñi sa cua coo ndo minoo cuhva vaha ta minoo cuhva ma zayanga si sii ndo ta cua cuu zacahnu ndisa cuii ndo sii maa ra Ndyoo.

<sup>36</sup>Zoco tatu iyo ndo sica iñi ndo vaty vaha natindaha zehe ndo vaty cua yaha quivi ñu, vaha cuhva cuan. Natindaha ñu tatu cuñi ndo. Yivi cuaty cuu si.

<sup>37</sup>Zoco tatu iyo inga ndo sa nacañi vaha iñi ndo ta cuñi ndo sa ma tindaha zehe ndo. Vaha sa ma tindaha ñu.

<sup>38</sup>Vaha zavaha ra saha tindaha zehe, zoco vaha ca zavaha ra sa ña saha.

<sup>39</sup>Caty ley maa ra Ndyoo vaty nii ñi sa ndito minoo ra, iin ñi cuu ra sihin ñazihí ra. Zoco tatu sa sihi ra, cuu tindaha ña sihin yoo ra cuñi ña tatu sino iñi ra sii ra Cristo.

<sup>40</sup>Zoco sica iñi vaty zii ca cua cuñi ña tatu ma tindaha tucu ña. Ta sica iñi vaty sehi tuhun ya sa cuenda Tatyí Ii ra Ndyoo.

#### Ma zanduva yo sii hermano yo

**8** Ta vityi cua quehin sa cuenda ndyayu sa saha maa ñiyivi sii inga ndyoo. Sica iñi tahan tahan yo vaty sito yo ñaa sa cuu sa ndoo sa cuenda cuhva ya. Zacahnu yo sii yo vaty iyo xaan sa siñi tuñi sii yo cuñi yo. Zoco minoo cuhva vaha ca cuu sa cuñi yo sii tahan yo.

<sup>2</sup>Ta tatu iyo yo sica iñi yo vaty sito xaan yo, cuñi si catyi si vaty tañaha ca coto yo cuhva cuñi si coto yo.

<sup>3</sup>Zoco yoo ra cuñi xaan sii ra Ndyoo, sito ra Ndyoo sii ra cuan.

<sup>4</sup>Ta vityi sa cuenda sa casi yo ndyayu sa saha maa ñiyivi sii inga ndyoo, sito maa yo vaty inga ndyoo cuan ña vale si vaty minoo tuhun ñi ra Ndyoo iyo sa ndisa.

<sup>5</sup>Ityi ziqui ta nu ñuhu iyo cuaha sa catyi ñiyivi vaty ndyoo cuu si.

<sup>6</sup>Zoco sa cuenda maa yo, iyo minoo tuhun ñi ra cuu Ndyoo Zutu yo. Ta i zavaha maa ra tandihí sa iyo. Ta sa cuenda maa ra iyo yo. Ta iyo minoo tuhun ñi ra ndyaca ñaha sii yo, ra Jesucristo. Ta sa cuenda maa ra ta iyo tandihí sa iyo; ndya maa yo ta sa cuenda maa ra i sino yo.

<sup>7</sup>Zoco ña sito tandihí ñiyivi cuhva ya vaty iyo ñiyivi i zacahnu inga ndyoo cumañi ca coto ñu sii ra cuu Ndyoo sa ndisa, ta ndya cuhva ndya vityi sica iñi ñu vaty ndito inga ndyoo cuan. Ta tatu cua casi ñu ndyayu cuan, sica iñi ñu vaty cuaty cuu si nuu ra Ndyoo.

<sup>8</sup>Zoco Ndyoo ñahñi cuenda ra tatu casi yo sii si a ma casi yo. Yivi cuaty cuu tatu casi yo, ta yivi cuaty cuu tatu ma casi yo.

<sup>9</sup>Zoco zacuenda ndo sii ndo coto zativi ndo sii minoo hermano, ra tañaha ca sino vaha iñi, sihin minoo cuhva sa cua zavaha ndo.

<sup>10</sup>Tatu ndyehe minoo ra sii yoho vaty sasun ndyayu sa saha maa ñiyivi sii inga ndyoo. Cua casi tucu ra cuan vazu sica iñi ra vaty ña vaha.

<sup>11</sup>Ta sa cuenda sa sito xoon ta sasun ta cua zativun sii minoo hermano. Ta sa cuenda tucu ra cuan i sihi ra Cristo vaty ma cunaa ra.

<sup>12</sup>Tatu tacuan zavaha yo ta zativi yo sii minoo hermano ta sino vaha

ca iñi, cuatyi cuu si ityi nuu ra Cristo.

<sup>13</sup>Yucuan cuenda catyi, tatu sa cuenda sa casi mi coño cuan ta zativi si sii minoo hermano. Ma casi que sii si caña ñi coto zativi sii ra ta coo cuatyi ra.

**Tyiño tahan si zavaha  
minoo ra apóstol**

**9** Yuhvi cui minoo ra apóstol. Ta ndisa vatyi yoñi ñiyivi ndyaca ñaha sii. I ndyehi sii ra Jesucristo, ra ndyaca ñaha sii yo. Ta maa ndo cuu tyiño mi vatyi sa cuenda mi i sino iñi ndo sii ra ndyaca ñaha sii yo.

<sup>2</sup>Vazu sica iñi inga ñiyivi vatyi yivi minoo apóstol cui, zoco sito vaha maa ndo vatyi zuun ra cui. I sino iñi ndo Tuhun Ndyoo vatyi maa ra Jesús i tava tyiño sii, sa zacote sii ndo.

<sup>3</sup>Vityi cua nacatyi minoo cuhva sihin ñiyivi sa cuñi tyaa cuatyi sate.

<sup>4</sup>Iyo cuhva sii, ta cuu quihin tandihi sa saha maa ñiyivi sa casi ta sa cohi.

<sup>5</sup>Ta tatu coo ñazihí, ñaha sino iñi, cuu caca noo ña sihin, tyiño ra Ndyoo. Tacuan zavaha inga ra apóstol, ta yañi ra Jesús, ta ra Pedro tucu.

<sup>6</sup>Yuhvi ta ra Bernabé i zandoo ndi tyiño ndi vatyi cua cahan ndi Tuhun Ndyoo. Ta ña cuñi ndo tyindyee ndo sii ndi. ¿Ñaa cuenda sa ña cuñi ndo tyindyee ndo sii maa ndi, ta tyindyee ndo sii tandihi inga ra cahan Tuhun Ndyoo?

<sup>7</sup>Tyiyahvi ra ndyaca ñaha sii ra cu zandaru. Ta ra tasi yoho uva, sasi

ra yucu vixi si. Ta ra zacuenda quití, cuu coho ra zicui ti.

<sup>8-9</sup>Ta ma caca iñi ndo vatyi maa ñi cuhva sa sica ñi iñi mi cuu sa nacatyi ihya. Ña tacuan vatyi nu ley ra Ndyoo i tyaa ra Moisés catyi si tyehen: “Ma cuhñi ndo yuhu zindiqui nu zatyiño ti nu sañi ti siti yutu ta quita zoo si. Nacasi ti zuhva.” Ña iin ñi sa cuenda quití cahan ra Ndyoo tuhun cuan.

<sup>10</sup>Cahan ra sii si sa cuenda maa yo vatyi ra tahvi ñuhu ta ra naquihin ndaha tyiño, nduu tahan ra cuñi ra quihin ra zuhva zuhva sa vaha sa cuenda tyiño ra.

<sup>11</sup>I tasi maa ndi Tuhun Ndyoo nu yucu ndo. Ta yivi sa cuaha cuu si tatu quihin ndi zuhva zuhva sa vaha sii ndo (tatu tyindyee ndo sii ndi zuhva sihin ndaha tyiño).

<sup>12</sup>Tatu tyindyee ndo sii inga ra nacatyi Tuhun Ndyoo sihin ndo, ñihi ca cua tyindyee ndo sii nduhvi. Zoco ña cahan ndi. Zandyee ndi iñi ndi sihin tandihi cuii cuhva coto ma cuñi ndo Tuhun Ndyoo.

<sup>13</sup>Sito tandihi ndo vatyi ra zatyiño vehe ñuhu hebreo sasi ra sa iyo yucuan. Zatyño ra nu saha maa ñiyivi quití sii ra Ndyoo, ta cuu quihin ra coño ti.

<sup>14</sup>Ta zuun ñi cuhva cuan cuñi ra Ndyoo vatyi ñiyivi nacatyi Tuhun Vaha ra, cuñi si sa tyindyee ñiyivi sino iñi cuan sii ra.

<sup>15</sup>Zoco yuhvi tañaha ca cua caque tundyee iñi sii maa ndo. Ta ña tyei cuhva ya vityi vatyi cuñi sa cua tyindyee ndo sii. Na tahan iñi sa tyiyahvi ñiyivi sii ta nacatyi Tuhun Ndyoo. Vaha ca nacui zoco.

<sup>16</sup>Ta vazu nacatyí xein Tuhun Vaha ra, zoco ma cuu catyí vatyí vaha xein vatyí maa ra Ndyoo zañiñi sii. Ta ndahví vii ra ndahví tatu ma zavehi cuhva catyí ra.

<sup>17</sup>Tatu zatyíñe tyiño ya vatyí cuñi, cua tyiyahví ra Ndyoo sii. Zoco vazu ña cuñi zatyíñe sii si, zoco tyiño sa i saha maa ra Ndyoo sii cuu si.

<sup>18</sup>Ta yahví sa ñihi cuu sa zii xaan cuñi vatyí cuu nacatyí Tuhun Ndyoo ta ma zatyiyahví sii ñiyivi. Ña síque sa tahan si sii sa cuenda tyiñe.

<sup>19</sup>Ta yivi minoo muzu cui, zoco minoo muzu zandui sii, sii tandíhi cuii ñiyivi vatyí tacuan ta cuu zasine iñi ñu tuhun ra Cristo.

<sup>20</sup>Tatu cuhin nu ndyaa ñiyivi hebreo, ndui tañi maa ñu vatyí cuñi sa cua sino iñi ñu sii ra Cristo. A tatu ndyei sihin ñiyivi tyaa xaan yahví tandíhi ley sahnu, tyei yahví sii si vatyí cuñi sa cua sino iñi ñu sii ra Cristo. Zoco ña ndyaca ñaha ley cuan sii, sa ndisa cuii.

<sup>21</sup>Ta tatu cuñi tyindyeyi sii ñiyivi tañaha ca sino iñi, ndui tañi maa ñu, zoco ña zavehi sa ña vaha tañi maa ñu vatyí tyei yahví sii ra Cristo.

<sup>22</sup>Tatu ndyei sihin ñiyivi tañaha ca sino vaha iñi, ndui tañi maa ñu vatyí tacuan ta cuu cahan que Tuhun Ndyoo sihin ñu, ta cua sino ca iñi ñu. Ndui tañi cuhva iyo sa ziiñ ziiñ ñiyivi vatyí tacuan ta cua tyizoho ñu sa quehin, ta iyo ñu cua cacu ñu.

<sup>23</sup>Tacuan zavehi sa cuenda Tuhun Vaha ra Ndyoo vatyí cuñi sa cua tyindyeyi si sii tandíhi ñiyivi, ta cua zacacu si sii yo.

<sup>24</sup>Sito ndo vatyí nu iyo minoo carrera, sino tandíhi ra sino, zoco minoo tuhun ñi ra zahacanaa. Yatyí cono ndo tacuhva cuu zahacanaa ndo.

<sup>25</sup>Ta yoo ra cuñi zahacanaa, zandoo ra tandíhi sa cuu zativi sii ra. Cumi vaha xaan ra sii ra. Tacuan zavaha ra vatyí cuñi ra zahacanaa ra minoo corona ndaha yutu ñi sa cua tiví. Zoco maa yo nducu yo cuhva zahacanaa yo minoo sa ma ndíhi.

<sup>26</sup>Yucuan cuenda sino mi, zoco yivi tañi sa ña site ndyamaa cuehin. Ta sañi tehin tañi minoo ra cuñi zahacanaa.

<sup>27</sup>Ta zandyehi tundoho sii coño ñuhi ta cundyaca ñehi sii si coto sa yaha zacuehi sii inga ñiyivi ta ziqui zuun ñi mi cua nandoi ityi sata.

### Ma zacahnu yo sii inga ndyoo

**10** Cuñi sa cua coto ndo, hermanos, tandíhi sa i tahan zutu sahnu yo ityi cuahan ra nu cu si desierto ta sa naha. I tasi ra Ndyoo minoo vico sa cuahan ityi nuu tandíhi ra, ta zañaha si ityi sii ra. Ta i yaha tandíhi ñu sisi tyañuhu.

<sup>2</sup>Ta tacuan i sicoo ndutyá tandíhi ñu sisi vico cuan ta sisi tyañuhu vatyí cua cundyico ñu sii ra Moisés.

<sup>3</sup>Ta i sasi tandíhi ñu ndyayu i saha maa ra Ndyoo sii ñu.

<sup>4</sup>Ta i sihi tandíhi ñu ndutyá i saha maa ra Ndyoo sii ñu. Ta ndutyá i sihi ñu i tava ra Ndyoo sisi minoo yuu vatyí coho ñu. Ta yuu cuan cuu tañi maa ra Cristo.

<sup>5</sup>Zoco vazu i ndyehe tandíhi ñu sa ndyityi i zavaha maa ra Ndyoo ityi,

zoco cuaha xaan ñu ñá zavaha ñu cuhva cuñi ra Ndyoo, ta ñá tahan iñi ra, ta i zanaa ra sii ñu.

<sup>6</sup>Ta tandihi cuhva cuan zañaha si minoo cuhva sii maa yo vaty ma cuñi yo sii sa ña vaha tañi i cuñi maa ñu.

<sup>7</sup>Ta ma zacahnu yo sii inga ndyoo tañi i zavaha zuhva maa ñu. Catyi Tuhun Ndyoo: “I sasi ñiyivi, ta i sihi ñu, ta ziqui i nduvita ñu vaty cua cata saha ñu” (vatyi zacahnu ñu sii zindiqui xuhun cuaan).

<sup>8</sup>Ta ma cuzu yo sihin numinoo ñaha tatu ma tindaha xihna yo. Minoo quivi i sihi oco uñi mil ñu vaty i zavaha ñu cuaty cuan.

<sup>9</sup>Ta ma coto ihñi yo sii ra ndyaca ñaha sii yo tañi i zavaha zuhva maa ñu, ta i sahñi coo sii ñu.

<sup>10</sup>Ta ma cahan ndo sii ra Ndyoo tañi i zavaha zuhva maa ñu, ta i tasi ra Ndyoo sii minoo ángel sa cua cahñi sii ñu, ta i sihi ñu.

<sup>11</sup>Tandihi cuhva ya i tahan zutu sahnu yo ta sa naha, ta i sicundyaa si nuu tutu Ndyoo vaty coto yo. Ta zañaha si sii yo vaty ma zavaha yo cuhva cuan. Ta maa yo cuu yo ndito nu sa cuñi ndihi tyiemvu.

<sup>12</sup>Yucuan cuenda tatu sica iñun vaty ñi xaan iñun sii ra Ndyoo, zoco coto vohon suun coto zavohon cuaty.

<sup>13</sup>Tandihi cuñi cuaty sa cuñun zavohon ta iyo tucu inga ñiyivi cuñi zavaha cuhva cuan. Zoco cuu cunii iñi yo sii ra Ndyoo vaty ma cuhva maa ra sa cuñi xaan con zavohon sa ña vaha. Cua zañaha ra minoo ityi suun, ta cua cuu conon sii sa cuñi zativi suun. Ta cua cundyee iñun ta ma zavohon sii si.

<sup>14</sup>Yucuan cuenda, ndoho hermanos, zandoo ndo sa zacahnu ndo sii inga ndyoo.

<sup>15</sup>Quehin sihin ndo tañi sa ñiyivi siñi tuñi xaan cuu ndo. Tyizoho vaha ndo sa catyi tatu ndisa a ña ndisa cuu si.

<sup>16</sup>Quivi sa nacohon iñi yo vaty i sihi ra Cristo nuu cruz sa cuenda maa yo, sihi yo vino ta sasi yo pan. Sa sihi yo vino cuan iñ ñi, cuñi si catyi si vaty tyindyee ñiñi ra Cristo sii tandihi yo. Ta pan cuan cuñi si catyi si vaty tyindyee coño ñuhu ra Cristo sii tandihi yo.

<sup>17</sup>Vazu cuaha yo cuu yo, zoco minoo ñi pan sasi yo, ta yucuan cuenda minoo ñi coño ñuhu cuu yo.

<sup>18</sup>Ndyehe ndo cuhva iyo ñiyivi hebreo, saha ñu sa saha maa ñu sii ra Ndyoo, ta sasi ñu zuhva si. Ta sihin cuhva cuan ndu-iñ ñu.

<sup>19</sup>Ña catyi sihin ndo vaty ndisa iyo cuhva sii inga ndyoo. Ñahñi. Ta ñahñi tucu cuhva iyo sii coño sa saha maa ñiyivi sii inga ndyoo.

<sup>20</sup>Zoco tyehen catyi vaty ñiyivi sa ña sito sii ra Ndyoo, saha ñu sa saha maa ñu sii cuihna ta yivi sii ra Ndyoo. Ta ña cuñi sa ndu-iñ ndo sihin cuihna.

<sup>21</sup>Ma cuu coho ndo vino cuenda ra Cristo ta vino cuenda cuihna. Ta ma cuu casi ndo nu ndyaa mesa ra Ndyoo ta nu ndyaa mesa sii cuihna.

<sup>22</sup>¿Atu cuñi yo sa cuxaan ra Ndyoo sihin yo? ¿Atu iyo ca tundyee iñi sii maa yo ta ziqui ca ra Ndyoo?

**Cuu zavaha yo ñaa sa cuñi yo tatu ma zativi si sii inga hermano**

<sup>23</sup>Cuu zacuu yo ñaa sa cuñi maa yo, zoco ma tyindyee tandihi si

sii yo. Ndisa, saha maa ra Ndyoo sa zavaha yo ñaa sa cuñi yo, zoco ma tyindyee tandihi si sii yo ta ndundyee ca yo sihin Tuhun Ndyoo.

<sup>24</sup>Cuñi si sa nducu yo cuhva coo sa vaha sii inga ñiyivi ta yivi sii sa maa ñi maa yo.

<sup>25</sup>Casun ñaa ñi maa sa xico ñiyivi nuyahvi, ta ma nducu tuhun tatu sa saha maa ñiyivi sii si sii inga ndyoo coto caca iñi ndo tatu vaha a ña vaha tatu casi ndo.

<sup>26</sup>Vatyí tandihi sa iyo ñuu ñiyivi cuu cuenda ra ndyaca ñaha sii yo.

<sup>27</sup>Ta tatu cua cana minoo ñiyivi ña sino iñi sii ndo vatyí casi ndo vehe ñu ta cuñi ndo cuhun ndo, cuu cuhun ndo ta casi ndo ñaa sa saha maa ñu sii ndo. Ta ma nducu tuhun ndo tatu sa cuenda inga ndyoo cuu si.

<sup>28</sup>Zoco tatu catyí ñu sihin ndo: “Coño sa saha maa ñiyivi sii inga ndyoo cuu ya”, catyí ñu. Ma casi ndo sii si coto zatívi ndo sii ñu nacatyí sihin ndo ta caca iñi ñu vatyí zavaha ndo cuatyí.

<sup>29</sup>Zatívi si sii inga ñiyivi ta yivi sii maa ndo. Ta iyo ndo cua catyí ndo: “¿Ñaa cuenda cua zaña ndi sa vaha, tatu sa sica iñi ñiyivi ñi cuu si?”

<sup>30</sup>Saha ndi tyahvi ndyoo sii Ndyoo sa cuenda sa cua casi ndi, ta ñaa cuenda cua cahan ñiyivi sii ndi tatu casi ndi sii si?” cua catyí ndo.

<sup>31</sup>Ta cua catyí sihin ndo vatyí ñaa ñi maa sa casi ndo a ñaa ñi maa sa coho ndo, zavaha ndo sii si minoo cuhva sa cua tahan iñi ra Ndyoo ta cua zacahnu si sii ra.

<sup>32</sup>Ma zatívi ndo sii ñiyivi hebreo a sii inga ñiyivi a sii ñiyivi sino iñi Tuhun Ndyoo.

<sup>33</sup>Zavaha ndo cuhva zavehi vatyí zavehi cuhva tahan iñi ñiyivi, ta ma caca iñi ñu vatyí iyo cuatyí. Ta ña nduqui sa vaha sa cuenda ñi mi. Nduqui sa vaha sa cuenda cuaha xaan ñiyivi vatyí tacuan ta cua sino iñi ñu ta cua cacu ñu.

**11** Cundyico ndo sii mi tañi ndyique sii ra Cristo.

### **Cuhva cuñi si zavaha ñuzihí nu iyo culto**

<sup>2</sup>Ta vityí, zii xaan cuñi, hermanos, vatyí nacohon iñi ndo sii mi tandihi cuhva ta tyaa ndo yahvi cuhva sa zacuehi sii ndo.

<sup>3</sup>Zoco cuñi sa cua coto ndo vatyí ra Cristo cuu xiñi sii tandihi rayii vatyí ndyaca ñaha ra sii ra. Ta rayii cuu xiñi sii ñazihí ra. Ta ra Ndyoo cuu xiñi ra Cristo.

<sup>4</sup>Tatu zahvi minoo ra zahma xiñi ra ta cahan ra sihin ra Ndyoo sisi vehe ñuhu a cuhva sa cahan ra tuhun saha ra Ndyoo sii ra, saha ra ticahan nuu sii ra Cristo cuhva cuan.

<sup>5</sup>Zoco tatu ma zahvi ñuzihí zahma xiñi ñu cuhva cahan ñu sihin ra Ndyoo a cuhva cahan ñu tuhun i saha ra Ndyoo sii ñu, cuu si tañi sa zatya xiñi ñu. Ta saha ñu ticahan nuu sii yí ñu vatyí tatu ma zahvi ñu zahma xiñi ñu cuñi si catyí si vatyí ña ndyaca ñaha yí ñu sii ñu.

<sup>6</sup>Tatu ña cuñi ñuzihí sa cuzahvi xiñi ñu, nazatya xiñi ñu. Zoco tatu saha si ticahan nuu sii ñuzihí sa zatya xiñi ñu, nazahvi ñu zahma xiñi ñu.

<sup>7</sup>Ña vaha sa zahvi rayii zahma xiñi ra vatyí tañi caa maa ra Ndyoo

caa ra. Ta ndyaca ñaha ra sii ñazihí ra tañi ndyaca ñaha ra Ndyoo sii maa ra.

<sup>8</sup>Quivi i zavaha ra Ndyoo sii rayii, ñá zavaha ra sii ra sihin yiqui naha ñaha. Zoco i zavaha ra sii ñaha sihin yiqui naha rayii.

<sup>9</sup>Xihna ca i zavaha ra Ndyoo sii rayii. Ta sa cuenda rayii i zavaha ra sii ñaha.

<sup>10</sup>Yucuan cuenda cuñi si sa zahvi ñuzihí zahma xiñi ñu. Zañaha si vatyí ndyaca ñaha yíi ñu sii ñu. Ta tacuan ta zii cua cuñi ángel sa ndyehe si cuhva cuan.

<sup>11</sup>Zoco sa cuenda maa yo, ra sino iñi, ta siñi ñuhu rayii sii ñu zihí, ta siñi ñuhu ñu zihí sii rayii. Ta cuñi si nduu tahan ñu sa cuenda tyiño ra Ndyoo.

<sup>12</sup>Yiqui naha rayii i sino minoo ñu zihí sa xihna ñi, ta vityi zacacu ñu zihí sii tandihí rayii. Ta maa ra Ndyoo zavaha tandihí sa iyo.

<sup>13</sup>Ta vityi catyi maa ndo tatu vaha a ña vaha tatu ma zahvi ñuzihí zahma xiñi ñu ta cahan ñu sihin ra Ndyoo.

<sup>14</sup>Sito ndo vatyí saha si ticahan nuu sii rayii tatu nañi xaan xiñi ra.

<sup>15</sup>Zoco tatu nañi xaan xiñi ñu zihí, zii xaan cuñi ñu sihin si vatyí saha ra Ndyoo sa cunañi ixi xiñi ñu vatyí zahvi si xiñi ñu.

<sup>16</sup>Ta tatu iyo minoo ra cuñi cahñi tahan saha tuhun ya, cuñi si sa coto ndo vatyí ñahñi inga ca costumbre iyo sii maa ndi a sii vehe ñuhu ra Ndyoo.

#### **Nacatyí ra Pablo vatyí ña vaha cuhva zavaha ñu Santa Cena**

<sup>17</sup>Ta vityi iyo inga cuhva cuñi nacatyí sihin ndo. Ta ña zii cuñi

sihin ndo cuhva ya vatyí titahan ndo, zoco ña tyindyee si sii ndo. Zativity si sii ndo.

<sup>18</sup>Nacatyí ñiyivi sihin, vatyí cuhva titahan ndo sa zavaha ndo culto ta ña iin ñi cuhva sica iñi ndo. Ta sino iñi zuhva sa cahan ñiyivi sii ndo.

<sup>19</sup>Cuñi ndo sa coo ziiin ndo, ta tacuan ta cua coto ñiyivi yoo ndo sino iñi sa ndisa cuui, cuñi ndo.

<sup>20</sup>Ta cuhva sa titahan ndo, yivi Santa Cena cuu sa sasi ndo sa ndisa

<sup>21</sup>vatyí minoo minoo ndo cuxiñi ndo cuhva cuñi maa ndo. Iyo ndo numi ndo ta sasi ndo cuaha, ta inga ra ña ñihi ra ta sizoco ra. Ta iyo tucu ndo siñi ndo.

<sup>22</sup>¿Atu ñahñi vehe ndo nu cuu casi ndo ta coho ndo? Zanduquiñi caa ndo sii vehe ñuhu ra Ndyoo, ta saha ndo ticahan nuu sii ra hermano ndahvi, ra ñahñi sa cuaha casi. ¿Yozo caa cua catyi sihin ndo vityi sa cuenda cuhva ya? ¿Atu catyi vatyí vaha zavaha ndo? Ma catyi.

#### **Cuenda sa vatyí iyo Santa Cena**

<sup>23</sup>Saha maa ra Jesús cuhva ya sii mi tañi sa nacatyí sihin ndo vatyí zuun ñi sa cuaa sa saha cuenda ra Judas sii ra Jesús, sa xihna ñi i quihin ra Jesús pan.

<sup>24</sup>Ta sa yaha saha ra tyahvi ndyoo sii ra Ndyoo, ta i tahvi ra sii si, ta zasa ra sii ra apóstol, ta catyi ra: “Casi ndo. Ihya cuu tañi coño ñuhi. Cua tahvi si sa cuenda maa ndo. Zavaha ndo cuhva ya vatyí cua nacohon iñi ndo sii.” Catyi ra.

<sup>25</sup>Ta sa yaha sasi tandihí ra pan, ta i tiin ra Jesús tasa ta catyi ra:

“Sihin ihya zandaa ra Ndyoo minoo tyiño saa sihin ndo. Ihya ñoho vino ta cuu si tañi niñi. Tandihí saha sa cua coho ndo sii si, coho ndo sii si vatyi nacohon iñi ndo sii.” I catyi ra Jesús quívi cuan.

<sup>26</sup>Ta tandihí saha titahan ndo ta casi ndo pan ta coho ndo vino cuhva ya, zañaha ndo sii ñiyívi cuhva i sihi ra Jesús ndya quívi cua quisi tucu ra.

### **Cuhva cuñi si zavaha yo Santa Cena**

<sup>27</sup>Tatu casi yo pan ya ta coho yo vino ra Cristo sihin minoo cuhva ña tahan iñi ra Ndyoo, cua coo cuatyí yo vatyi ña tyaa yo yahvi sii coño ñuhu ta niñi ra ndyaca ñaha sii yo.

<sup>28</sup>Cuñi si sa ndyehe vaha yo sii yo tatu iyo vaha yo sihin ra Ndyoo, ta ziquí casi yo pan cuan ta coho yo vino cuan.

<sup>29</sup>Vatyi tatu casi yo ta coho yo ta ña zaha yo cuenda vatyi coño ñuhu ra Cristo cuu si, zavaha yo minoo cuhva sa cua tasi tuñi ra Ndyoo sii yo.

<sup>30</sup>Ta zuun ñi yucuan cuenda cuaha xaan ndo cuhu ndo ta vita iyo ndo, ta iyo ñu tahan ndo sa yaha sihi ñu.

<sup>31</sup>Zoco tatu ndyehe vaha yo sii yo, ma tahan yo tacuan.

<sup>32</sup>Zoco tatu tacuan zavaha ra Ndyoo sihin maa yo, cañi ra sii yo vityi sa vatyi ma cunaa yo sihin inga ñiyívi ñuu ñiyívi.

<sup>33</sup>Ta yucuan cuenda, ndoho hermanos, tatu titahan ndo sa cuenda Santa Cena, cuatu noo ndo sii inga ndo ta iñi ñi casi ndo ta coho ndo.

<sup>34</sup>Zoco tatu iyo ndo sizoco ndo, casi xihna ndo ndya vehe ndo coto

zavaha ndo minoo cuhva sa ma tahan iñi ra Ndyoo ta cua tasi tuñi ra sii ndo. Ta inga tucu tyiño sa cumañi ndundoo cua zandundoi quívi cua cuhin nu yucu ndo.

### **Ndatu sa saha Tatyí Ii sii minoo minoo yo**

**12** Hermanos, cuñi sa cua coto ndo tandihí sa vaha sa saha maa Tatyí Ii ra Ndyoo sii sa minoo minoo yo.

<sup>2</sup>Sito ndo vatyi quívi sa ña sito ndo sii ra Ndyoo, i saha ndo sii ndo sa cundyaca ñaha inga ndyoo sa ña cuu cahan.

<sup>3</sup>Yucuan cuenda cuñi sa coto maa ndo vatyi tatu cahan minoo ra sihin cuhva saha Tatyí Ii sii ra, ma cuu cahan ra ndya vaha ñi sii ra Jesús. Ta ma cuu catyi ra vatyi ndyaca ñaha ra Jesús sii ra tatu ña tyindyee Tatyí Ii sii ra.

<sup>4</sup>Ziñ ziñ ndatu saha maa ra Ndyoo sii minoo minoo yo. Zoco zuun ñi maa Tatyí Ii cuu ra saha sii si.

<sup>5</sup>Ta ziñ ziñ cuhva zatyíño yo tyiño ra Ndyoo, zoco minoo ñi ra ndyaca ñaha sii yo.

<sup>6</sup>Ziñ tyiño saha ra sii sa minoo minoo yo, zoco minoo ñi ra Ndyoo cuu ra sityiño sii tandihí yo.

<sup>7</sup>Saha maa ra Tatyí Ii ra sii minoo minoo yo sihin minoo cuhva sa cuu tyindyee si sii tandihí yo.

<sup>8</sup>Vatyi sii minoo yo saha xaan ra sa siñi tuñi sa cuenda Tatyí Ii. Ta sii inga ra saha Tatyí Ii ndatu sa cuu nacoto ra minoo sa zacoto ra Ndyoo sii ra.

<sup>9</sup>Ta sii inga ra saha ra sa cuníi xaan iñi ra. Ta inga ra cuu

zanduvaha ra sii ñiyivi cuhu sihin Tatyí Ii.

<sup>10</sup>Inga ra cuu zavaha ra sa ndyityi. Ta inga ra cuu xaan nacatyí ra Tuhun Ndyoo. Inga ra cuu nacoto ra tatu cahan Tatyí Ii a tatyí ña vaha; inga ra cuu cahan ra zahan sa ña tuhva ra cahan; ta inga ra cuu nacatyí ra ñaa sa cahan ra cahan cuhva cuan.

<sup>11</sup>Ta tandíhi cuhva ya zavaha sa minoo tuhun ñi Tatyí Ii; ziiin ziiin cuhva saha maa ra sii sa minoo minoo yo cuhva cuñi maa ra.

**Tandíhi yo cuu yo minoo  
ñi coño ñuhu ra Cristo**

<sup>12</sup>Ra Cristo cuu tañi minoo coño ñuhu. Ta minoo coño ñuhu iyo sa ziiin ziiin cuhva sii si. Iyo xiñi si, iyo saha si, iyo ndaha si. Zoco sa tandíhi si cuan minoo ñi coño ñuhu cuu si.

<sup>13</sup>Ta tacuan cuu maa yo vatyí minoo ñi Tatyí Ii i zacoo ndutyá sii tandíhi yo, ta minoo ñi coño ñuhu cuu tandíhi yo sa sino iñi vazu cuu yo ñiyivi hebreo a griego a vazu iyo patrón yo a vazu yoñi. I ñihi tandíhi yo sa minoo ñi Tatyí Ii

<sup>14</sup>vatyí sa minoo coño ñuhu, iyo cuaha cuhva sii si, yivi sa minoo ñi.

<sup>15</sup>Tatu catyí saha cuan: “Yivi ndaha cui, ta yucuan cuenda yivi sa cuenda coño ñuhu cui.” ¿Atu ndisa sa cahan si?

<sup>16</sup>A tatu catyí zoho cuan: “Yivi siti nuu cui, ta yucuan cuenda yivi sa cuenda coño ñuhu cui.” ¿Atu ndisa?

<sup>17</sup>Tatu tandíhi coño ñuhu cuan cuu siti nuu, ¿yozo caa cua cuiñi si? A tatu tandíhi coño ñuhu cuu zoho, ¿yozo caa cua ñihi si xico?

<sup>18</sup>Zoco i zavaha ra Ndyoo ziiin ziiin cuhva sihin minoo coño ñuhu cuhva cuñi maa ra.

<sup>19</sup>Tatu iin ñi cuhva caa tandíhi si, yivi minoo coño ñuhu cuu si, ta ña tyaqui cua cuu si.

<sup>20</sup>Zoco sa cuenda sa cuaha cuhva iyo sii si, ta minoo ñi coño ñuhu cuu si.

<sup>21</sup>Ma cuu catyí siti nuu cuan sihin ndaha cuan: “Ña siñi ñuhun sii, cuahan.” Ta ma cuu catyí xiñi cuan sihin saha cuan: “Ña siñi ñuhun sii.”

<sup>22</sup>Ña tacuan, vatyí zuhva coño ñuhu caa si tañi sa ña ñiñi si, yucuan cuu sa ñiñi xaan ca.

<sup>23</sup>Ta zuhva coño ñuhu sa sica iñi yo vatyí ma tyaa yo yahvi sii si, yucuan cuu sa ñihi ca zacuenda yo. Ta sii sa quiñi ca caa, zandutyáqui ca yo sii si.

<sup>24</sup>Ta sihin sa tyaqui ca caa, ñahñi zavaha yo. Ta i zandu-iin ra Ndyoo sii coño ñuhu ra sihin minoo cuhva zacahnu ca si sii ra hermano ña tuhva ñiyivi tyaa yahvi. Ta maa yo cuu coño ñuhu ra.

<sup>25</sup>Ta tacuan i zavaha ra vatyí ma cuziin ziiin coño ñuhu ra, zoco cua zacuenda tahan si sii tahan si.

<sup>26</sup>Tatu zuhva coño ñuhu ra Cristo ndyehe si tundoho, ndyehe tandíhi si tundoho. Ta tatu iyo zuhva si zacahnu ñiyivi, tandíhi si cua cuziñi iñi.

<sup>27</sup>Ta maa yo cuu coño ñuhu ra Cristo. Minoo minoo yo cuu yo zuhva zuhva coño ñuhu ra.

<sup>28</sup>Ta i tyihi ra Ndyoo sii minoo minoo yo sisi vehe ñuhu ra vatyí cuu tyindyee yo sii inga yo. Ra ñiñi ca cuu ra tava ra Jesús tyiño sa cuu ra apóstol. Sa cu uu cuu ra cahan

tuhun saha ra Ndyoo sii ra; profeta cuu ra. Sa cu uñi cuu ra zacuaha. Ta ziqui iyo ra zavaha sa ndyityi, ta ra zanduvaha sii ñiyivi cuhu, ta ra cuu tyindyee sii inga hermano, ta ra cuu cundyaca ñaha sii inga hermano, ta ra cuu cahan inga zahan sa ña tuhva ra cahan.

<sup>29</sup>Ña tandihi yo cuu yo apóstol a ra cahan tuhun saha ra Ndyoo sii ra, a ra zacuaha, a ra zavaha sa ndyityi.

<sup>30</sup>Ña tandihi yo cuu zanduvaha yo sii ñiyivi cuhu a cahan yo lengua a nacatyí yo ñaa sa cahan ñiyivi cahan lengua.

<sup>31</sup>Zoco nacuñi yo sa vaha ca. Ta cua zañehi sii ndo minoo ityi vaha xaan ca.

**Cuhva cuñi si sa cuñi  
xaan yo sii ñiyivi**

**13** Vazu cuu quehin zahan sa cahan ñiyivi ta sa cahan ángel, zoco tatu ña cuñi sii ñiyivi, minoo nduzu ñi cui tañi nañi minoo tamvu a nañi minoo caa.

<sup>2</sup>Ta vazu cuu xaan quehin tuhun saha ra Ndyoo sii, ta cutuñi iñi tandihi sa xehe ta tandihi sa siñi tuñi sii maa ra Ndyoo, ta tatu ñi xaan cuu iñi ndya cuhva ndya cuu zacuñi siye yucu zoco ña cuñi sii ñiyivi, ñahñi maa ra cui.

<sup>3</sup>A tatu sehi tandihi cuii ndaha tyiñe sii ñiyivi ndahvi ta cuhve sa cayu coño ñuhi zoco ña cuñi sii ñiyivi, ñahñi maa cua tyindyee si sii.

<sup>4</sup>Tatu cuñi xaan yo sii ñiyivi, zandyee xaan yo iñi yo sihin ñu ta zavaha xaan yo sa vaha sihin ñu. Ma cuxaan yo tatu iyo sa vaha sii ñu. Ma zacahnu yo sii yo ta catyi yo vatyí vaha xaan maa yo.

<sup>5</sup>Tatu cuñi xaan yo sii ñiyivi, ma cuhva yo ticahan nuu sii ñu. Cua nanducu yo sa vaha sii ñu ta yivi sa cuenda ñi maa yo. Ma yatyi xaan cuxaan yo. Ta ma ndoo sa cuxaan yo añaima yo.

<sup>6</sup>Tatu cuñi xaan yo sii ñiyivi, ma cuzii iñi yo tatu zavaha ñu sa ña vaha, zoco cua cuzii iñi yo sihin sa vaha ta sa ndoo.

<sup>7</sup>Tatu cuñi xaan yo sii ñiyivi, zandyee yo iñi yo sihin tundoho sa saha ñu sii yo; sino iñi yo vatyí cua zavaha ñu sa vaha; ñi cuu iñi yo sii ñu. Ta cua zandyee yo iñi yo ñaa ndihi cuii ca tundoho.

<sup>8</sup>Cuhva sa cuñi xaan yo sii ñiyivi ma naa si. Cua coo quivi ma cahan ca yo tuhun saha ra Ndyoo sii yo. Ma cahan ca yo lengua. Ma nacoto ca yo minoo sa zacoto ra Ndyoo sii yo.

<sup>9</sup>Vatyí vityí zuhva ñi sito yo, ta zuhva ñi cuu nacatyí yo Tuhun Ndyoo.

<sup>10</sup>Zoco quivi cua quisi ra Cristo ta cua naa tandihi inga cuhva cuan vatyí cua coto yo vatyí zuhva cuii ñi cuu sa sito yo vityí.

<sup>11</sup>Quivi i culuhli i quehin tañi cahan minoo ra luhlu, ta tacuan i cuu sa siñi tuñi, ta tacuan ñi i cutuñi iñi. Zoco quivi i sahani, i zandoi cuhva zacuu sa ndyihí.

<sup>12</sup>Ta zuun ñi cuhva cuan vityí, cuu yo tañi sa ndyihí sa cuenda ra Ndyoo. Cuu si tañi ndyehe yo zuhva ñi sihin minoo ino ta ña casi xaan ndyehe yo. Zoco quivi cua quisi ra Cristo, ta cua ndyehe vaha yo sii ra ityi nuu ra. Zuhva ñi sito yo vityí, zoco quivi cuan cua coto yo tandihi tañi sito ra Ndyoo sii maa yo vityí.

<sup>13</sup>Ta vityi ñii iñi yo sii ra Ndyoo. Ta iyo minoo sa ndatu yo. Quivi cua quisi ra Cristo cuu sa ndatu yo. Ta cuñi xaan yo sii ñiyivi. Ta sa ñiñi ca sisi sa uñi tahan ya cuu sa cuñi xaan yo sii ñiyivi.

**Cuhva cahan yo inga zahan  
sa ña tuhva yo cahan**

**14** Nducu ndo cuhva cuñi xaan ndo sii ñiyivi. Ta cuñi xaan ndo sa cua cuhva ra Ndyoo sa ziin ziin ndatu sa saha maa Tatyí li sii ndo. Ta sa ñiñi ca cuu sa cahan yo tuhun saha ra Ndyoo sii yo. Sa zaha yo profetizar cuu cuhva cuan.

<sup>2</sup>Vatyí tatu cahan ndo lengua, cahan ndo sihin ra Ndyoo, ña cahan ndo sihin ñiyivi vatyí yoñi cutuñi iñi sa cahan ndo. Cahan ndo sa xehe sihin maa ra Ndyoo.

<sup>3</sup>Zoco tatu cahan yo tuhun saha ra Ndyoo sii yo, cua cutuñi iñi ñiyivi. Cua zandundyee ca ra Ndyoo iñi ñu, ta cua cuhva ca ra tundyee iñi sii ñu tatu cuihya cuñi ñu.

<sup>4</sup>Tatu cahan yo lengua ndundyee iñi maa yo, zoco tatu cahan yo tuhun saha ra Ndyoo sii yo zandundyee yo iñi tandihi ñiyivi tyizoho.

<sup>5</sup>Cuñi vatyí cahan tandihi ndo lengua, zoco sa ñiñi ca cuñi sa zaha ndo profetizar vatyí tyindyee ca ra cahan cuhva cuan ta ziquí ra cahan lengua. Zoco tatu cuu nacatyí ra cahan lengua ñaa tuhun i cahan ra a tatu cuu nacatyí inga ndo, cua tyindyee si sii tandihi ndo.

<sup>6</sup>Ta quivi sei nu yucu ndo, hermanos, tatu maa lengua ñi quehin ma tyindyee si sii ndo

vatyí ma cutuñi iñi ndo. Zoco tatu quehin sihin tuhun sa cutuñi iñi ndo ta nacatyí tuhun sa saha ra Ndyoo sii a ñaa minoo cuhva sa catyí Tuhun ra ta zanducasi sii si, tyindyee si sii tandihi ndo.

<sup>7</sup>Taño ra zavacu guitarra a ra tiví cutu, tatu ma ñiñi ra cuhva tiví ra a ma ñiñi ra cuhva zavacu ra, ma nacoto yo ñaa yaa cuu si.

<sup>8</sup>Ta nu iyo cuatyí tatu ma tiví vaha ra tiví trompeta, ma coto zandaru yozo caa nu cundyaa listo ra.

<sup>9</sup>Ta tacuan tucu maa yo, tatu ma cahan yo tuhun sa cuu cutuñi iñi ñiyivi, ma coto ñu ñaa sa catyí yo. Taño sa ndyayu ñi yuhu yo cuu si.

<sup>10</sup>Iyo cuaha xaan nuu zahan ñuu ñiyivi ya, ta tandihi cuii si iyo cuhva cuñi si catyí si.

<sup>11</sup>Zoco tatu ña cutuñi iñi yo zahan sa cahan minoo ñiyivi, ma cuu natuhun yo sihin ra, ta ma cuu natuhun ra sihin yo.

<sup>12</sup>Site vatyí cuñi tandihi ndo ñiñi ndo ndatu sa saha Tatyí li sii ndo; yucuan cuenda catyí sihin ndo vatyí ñiñi xaan cuñi ndo cuhva vaha ca vatyí tacuan ta cua cuu tyindyee ndo sii tandihi hermano.

<sup>13</sup>Ta ndoho sa cahan lengua, caca ndo sii ra Ndyoo vatyí cuhva ra cuhva sa cuu nacatyí ndo ñaa sa cahan ndo.

<sup>14</sup>Vatyí tatu cahan yo lengua, cahan aña yo, zoco ña tyindyee sa siñi tuñi sii yo.

<sup>15</sup>Cuñi si sa cahan yo sihin ra Ndyoo sihin aña yo ta sihin sa siñi tuñi tucu yo. Cua cata yo sihin aña yo (sihin lengua) ta sihin sa siñi tuñi tucu yo (sihin tuhun sa cutuñi iñi yo).

<sup>16</sup>Vatyi tatu maa ñi sihin lengua zacahnun sii ra Ndyoo ta ndyaa inga ra ña sito ñaa sa cuu si, ma cuu zacahnu ra Ndyoo suhun vatyi ña cutuñi iñi ra sa cohon.

<sup>17</sup>Vazu vaha xaan nacuhvon tyahvi ndyoo sii ra Ndyoo, zoco ñahñi maa tyindyee si sii inga ra cuan.

<sup>18</sup>Sehi tyahvi ndyoo sii ra Ndyoo vatyi cuaha ca quehin lengua ta ziqui tandihi ndo.

<sup>19</sup>Zoco nu iyo culto vaha ca cuñi vazu ohon tahan ñi tuhun sa cuu cutuñi iñi ñiyivi quehin ta zacuehi sii ñu ta ziqui ca sa quehin usi mil tuhun sihin lengua sa ma cutuñi iñi ñu.

<sup>20</sup>Hermanos, ma cuu ndo tañi sa ndyih sihin cuhva iyo sa siñi tuñi sii ndo. Caca iñi ndo cuhva sica iñi ra sahnun, zoco tañi sa ña tuhva ra ndyih zavaha sa quiñi, cuhva cuan cuu tucu maa ndo.

<sup>21</sup>Catyi ra Ndyoo nuu libro sa cuu ley maa ra: “Cua quehin sihin ñiyivi ya sihin inga zahan, ta cua cutyiñe ñiyivi inga ñuu, zoco numaa tacuan ta ma tyaa ñu yahvi sa quehin.” Catyi ra.

<sup>22</sup>Yucuan cuenda, sa cahan yo lengua cuu minoo zeña zañaha ra Ndyoo sii ñiyivi sa ña sino iñi sii ra. Zoco sa cahan yo tuhun i saha ra Ndyoo sii yo cuu sa cuenda ñiyivi sa sino iñi ta yivi sa cuenda ñiyivi ña sino iñi.

<sup>23</sup>Tatu titahan tandihi ndo ta cahan tandihi ndo lengua, ta tatu quisi ñiyivi ña sito ñaa sa cuu si a ñiyivi ña sino iñi sii ra Ndyoo, cua vatyi ñu vatyi zana xiñi ndo.

<sup>24</sup>Zoco tatu tandihi ndo cahan ndo tuhun i saha ra Ndyoo sii ndo ta quihvi ñiyivi ña sino iñi a ña sito, cua nacoto ñu vatyi iyo cuaty ñu vatyi cutuñi iñi ñu sa cahan ndo.

<sup>25</sup>Cua coto ñu vatyi sito ra Ndyoo sa xehe sa iyo añima ñu. Ta cua cuiñi siti ñu, ta cua zacahnu ñu sii ra Ndyoo ta catyi ñu vatyi ndisa cuii ndyaa xaan ra Ndyoo sihin ndo.

### **Cuhva zavaha yo culto sihin minoo cuhva tyaqui ta vaha**

<sup>26</sup>Ihya cuu cuhva cuñi si, hermanos; tatu cua titahan ndo, tahan tahan ndo quisi ndo sihin minoo coro sa cuñi ndo cata ndo a minoo cuhva sa cua zacuaha ndo a minoo cuhva sa zacuaha ra Ndyoo sii ndo, ta nacaty ndo sii si. A cuu cahan ndo lengua a cuu nacaty ndo ñaa sa catyi ra cahan lengua. Tahan tahan ndo zavaha ndo cuhva sa cua tyindyee sii tandihi ndo.

<sup>27</sup>Tatu iyo ndo cuñi ndo cahan ndo lengua, nacahan a uu a uñi tahan ñi ndo minoo minoo ndo. Ta nacaty minoo ra ñaa sa catyi ndo.

<sup>28</sup>Zoco tatu yoñi nacoto, vaha ca ma cahan ndo lengua nu iyo culto. Cuae ñi cahan ndo maa ñi maa ndo sihin ra Ndyoo.

<sup>29</sup>Ta tatu iyo ndo cuñi ndo cahan ndo tuhun i saha ra Ndyoo sii ndo, cuu cahan a uu a uñi tahan ndo minoo minoo ndo. Tyizoho inga ndo ta ndyehe ndo tatu vaha a ña vaha sa cahan ra cahan.

<sup>30</sup>Ta tatu zacoto ra Ndyoo ñaa minoo cuhva sii minoo ra tyizoho, cuiñi si vatyi nacutaxi ra cahan cuan ta nacahan inga ra.

<sup>31</sup>Ta tacuan tandihi ndo sa ñihi ndo tuhun i saha ra Ndyoo sii ndo, cuu cahan ndo sii si minoo minoo ndo, ta cua cutuhva tandihi ndo cuaha ca, ta cua ñihi ca ndo tundyee iñi sihin Tuhun Ndyoo.

<sup>32</sup>Tatu saha maa ra Ndyoo minoo tuhun sii ndo sa cua cahan ndo, cuu cuatu noo ndo.

<sup>33</sup>Vatyi ña cuñi ra Ndyoo sa coo tizihí ta sa cuvaa. Cuñi ra sa coo sa vii tañi iyo tandihi inga vehe ñuhu nu titahan ra hermano.

<sup>34</sup>Nacutaxi ñu zihí nu iyo culto. Ma cuu cahan ñu vatyi catyi ley maa ra Ndyoo vatyi nacundyaca ñaha rayii.

<sup>35</sup>Ta tatu iyo sa cuñi ñu coto ñu, nandaca tuhun ñu sii yí ñu ndya vehe ñu vatyi ña tyaqui cuu si tatu cahan ñu nu iyo culto.

<sup>36</sup>Tatu sica iñi ndo inga cuhva, cuñi si sa nacohon iñi ndo vatyi ñá quisaha Tuhun Ndyoo sihin maa ndo. Ta ña vasi si sa cuenda sa maa ñi maa ndo.

<sup>37</sup>Tatu iyo ndo sica iñi ndo vatyi cuu cahan ndo tuhun saha ra Ndyoo sii ndo a tatu iyo ndo sica iñi ndo vatyi saha ra Ndyoo Tatyí li ra sii ndo, cua nacoto ndo vatyi cuhva tyei ihya cuu tyiño i tava ra ndyaca ñaha sii yo.

<sup>38</sup>Zoco tatu iyo ndo ña cuñi ndo coto ndo ñaa sa cuu sa ndisa, nandoo ndo tacuan ñi.

<sup>39</sup>Tacuan catyi sihin ndo hermanos, cuñi xaan ndo sa cahan ndo tuhun saha ra Ndyoo sii ndo, ta ma catyi ndo vatyi ma cuu cahan ñiyivi lengua.

<sup>40</sup>Vii ñi zavaha ndo tandihi ta ña vaa xaan.

### Cuhva i nandoto ra Cristo

**15** Vityi, yañi xaa, cuñi sa cua nacohon iñi ndo tuhun sa cuenda cuhva cacu yo, tuhun sa i zacote sii ndo. Sa i tiin cuenda ndo sii si, ta sino iñi ndo sii si ndya vityi.

<sup>2</sup>Ta zuun ñi si cuu sa zacacu sii ndo tatu ma naa iñi ndo tuhun sa zacote sii ndo, ta tatu ndisa cuii i sino iñi ndo sii si.

<sup>3</sup>Sa xihna ñi sa i zacote sii ndo cuu cuhva i sihi ra Cristo sa cuenda cuatyi maa yo tañi catyi Tuhun Ndyoo. Ihya cuu sa i cutuhva mi sa xihna ñi.

<sup>4</sup>Ta i tyihi ñiyivi sii ra sisi ñaña, ta sa cu uñi quivi i nandoto ra tañi catyi si nu tutu ra Ndyoo cuhva cua tahan ra.

<sup>5</sup>Ta i ndyehe ra Pedro sii ra ta ziqui ca tandihi usi uu tahan ra i tava ra tyiño.

<sup>6</sup>Yaha cuan ta i ndyehe ohon ziendu ra hermano sii ra iin ñi cuhva. Ta cuaha xaan ra cuan ndito ra ndya vityi, zoco iyo ra sa sihi ra.

<sup>7</sup>Cuee ca i ndyehe ra Jacobo sii ra, ta ziqui ca tandihi ra i tava ra Jesús tyiño.

<sup>8</sup>Ta sa yaha tandihi cuan ta ziqui i ndyehe tucu mi sii ra. Tañi minoo ra cuee xaan i cacu cui.

<sup>9</sup>Vatyi ñiñi ca tandihi inga ra i tava ra tyiño ta ziqui ca mi. Yivi ra vaha cui tañi inga ra i tava ra tyiño vatyi i zavaha xein sa ña vaha sihin ñiyivi ñoho cuenda ra Ndyoo quivi ta sino ca iñi.

<sup>10</sup>Zoco cahnú xaan cuu cuhva cundahvi iñi ra Ndyoo sii. Zaha xaan ra tumañi iñi sii, ta i tava ra

tyiño sii. Ta yivi sa caha ñi i tava ra tyiño sii vaty i zatyine ñihi ca ta ziqui tandihi inga ra i tava ra tyiño. Zoco yivi mi zatyino sa ndisa vaty i maa ra Ndyoo ndyaa sihin, ta maa ra zacuu tyiño cuan.

<sup>11</sup>Ta zuun ñi si cuu si a mi a inga ra vaty sa ñiñi ca cuu sa i zacoto ndi Tuhun Ndyoo sii ndo, ta i sino iñi ndo sii si.

**Ndisa vaty i cua nandoto ñiyivi i sihi**

<sup>12</sup>Nacaty i ndi sihin ndo vaty i nandoto ra Cristo sa yaha i sihi ra. ¿Ta ñaa cuenda iyo ndo caty i ndo vaty ma nandoto ñiyivi tatu sa yaha i sihi ñu?

<sup>13</sup>Zoco tatu sica iñi ndo vaty ma nandoto ñiyivi, vaziqui ndya ra Cristo ta ñá nandoto ra.

<sup>14</sup>Ta tatu ñá nandoto ra Cristo, sa caha ñi cuu sa nacaty i ndi Tuhun Ndyoo, ta sa caha ñi sino iñi ndo.

<sup>15</sup>Tatu ña ndisa vaty i zanandoto ra Ndyoo sii ra Cristo, ra vaty a cuu maa ndi vaty i caty i ndi vaty i zanandoto ra Ndyoo sii ra. Ta ñá zanandoto ra sii ra tatu ma nandoto ñiyivi i sihi, (tañi caty i maa ndo).

<sup>16</sup>Vaty i tatu ma nandoto ñiyivi i sihi, ñá nandoto ra Cristo.

<sup>17</sup>Ta tatu ñá nandoto ra Cristo, sa caha ñi sino iñi ndo sa i zandasi ra cuaty i ndo. Ndo ca cuaty i ndo sata ndo tatu ñá nandoto ra.

<sup>18</sup>Ta tatu tacuan cuu si, ndya cuhva ndya ra sino iñi sii ra Cristo, ra sa sihi, cunaa ra.

<sup>19</sup>Tatu cuhva sino iñi yo sii ra Cristo tyindyee si sii yo maa ñi ihya ñuu ñiyivi, ndahvi ñi cuu yo. Yoñi ca inga ñiyivi ndyehe ca tundoho ta ziqui maa yo.

<sup>20</sup>Zoco sa ndisa cuu si vaty i nandoto ra Cristo. Sa xihna ñi maa ra i nandoto nu yucu ñiyivi i sihi, ta yucuan cuenda cua nandoto tucu maa yo.

<sup>21</sup>Sa cuenda minoo rayii, ta i quisaha cuhva sihi ñiyivi. Ta sa cuenda inga rayii, ta i quisaha coo cuhva sa nandoto ñiyivi.

<sup>22</sup>Sa cuenda ra Adán ta sihi tandihi ñiyivi. Ta sa cuenda ra Cristo ta cua nandoto tandihi yo sa cuu cuenda ra.

<sup>23</sup>Zoco cua nandoto yo quivi tahan si sii yo. Xihna ca ra Cristo i sihi ta i nandoto ra, ta cuee ca, quivi quisi tucu ra, cua nandoto ñiyivi sa cuu cuenda ra.

<sup>24</sup>Yucuan cuu nu cua ndihi tuhun. Xihna ca cua zanaa ra Cristo cuhva sii tandihi ra ndyaca ñaha ta ra cu tyiño ta tandihi ra xaan iñi sii ra. Ta cua nacuhva cuenda ra tandihi si, ta cua cundyaca ñaha ra Ndyoo Zutu yo sii si.

<sup>25</sup>Vaty i tahan si sii ra Cristo cundyaca ñaha ra ndya cua zandih i ra cuhva sii tandih i ra xaan iñi sii ra.

<sup>26</sup>Ta minoo sa xaan iñi sii ra Cristo cuu cuhva sa sihi ñiyivi. Ta nu ndihi tuhun, cua zanaa ndihi ra cuhva cuan

<sup>27</sup>vaty i saha ra Ndyoo sa cundyaca ñaha ra Cristo tandih i. Zoco nu caty i Tuhun Ndyoo vaty i cua cundyaca ñaha ra tandih i, ña cuñi si caty i si vaty i cua cundyaca ñaha ra sii ra Ndyoo vaty i maa ra Ndyoo cuu ra saha sa cundyaca ñaha ra Cristo tandih i.

<sup>28</sup>Zoco tatu sa ndyaca ñaha ra Cristo, zehe ra Ndyoo, tandih i ta

ziqui cua cuhva cuenda ra tandihi si sii Zutu ra sa cundyaca ñaha maa ra, ta zuun ñi maa ra cua cuhva ra sii ra cundyaca ñaha Zutu ra. Ta ra Ndyoo cua cuu ra Ndyoo sii tandihi sa iyo.

<sup>29</sup>Ta inga tucu cuhva; iyo ndo sicoo ndutyua ndo sa cuenda ñiyivi i sihi. Zoco sica iñi ndo vatyí ma nandoto ñiyivi i sihi, ta sa caha ñi sa coo ndutyua ndo sa cuenda ñu tatu ma nandoto ñu.

<sup>30</sup>Ta tatu ma nandoto yo cuñi ndo, ¿ña cuenda sino iñi yo Tuhun Ndyoo? Ta tatu ma nandoto yo cuñi ndo, sa caha ñi cuu sa sino iñi yo Tuhun Ndyoo ta saha yo cuhva sii ñiyivi sa cahñi ñu sii yo ndya vaha ñi cuhva.

<sup>31</sup>Ndisa vatyí tandihi quivi cuñi cahñi ñiyivi sii. Ndisa xaan cuhva cuan tañi sa ndisa tucu vatyí zii xaan cuñi sihin maa ndo sihin cuhva sino xaan iñi ndo sii ra Cristo Jesús, ra ndyaca ñaha sii yo.

<sup>32</sup>Ta quivi sahñi tehin sihin ñiyivi tañi quití xaan cuu ñu ñuu Efeso ¿yozo caa cua tyindyee si cuan sii, tatu ma nandoto ñiyivi i sihi? Ta tatu sa ndisa vatyí ma nandoto ñiyivi, nacasi yo ta nacoho yo ta nacuzii iñi yo ñuu ñiyivi ya vatyí ityaan a iza cua cuu yo, ta cua ndihi si yucuan ñi.

<sup>33</sup>Ma cuhva ndo sa zandavi ñaha ñiyivi sii ndo. Ndisa minoo cuhva catyi si: “Tatu cu-iiñi ndo sihin ñiyivi ña vaha, cua zativi ñu sii ndo.”

<sup>34</sup>Zaha cuenda ndo ñaa sa cuu sa vaha, ta ma zavaha ca ndo cuatyí vatyí ndya vityí iyo ndo tañaha ca

coto ndo sii ra Ndyoo. Catyi cuhva ya vatyí cuñi sa cucahan nuu ndo.

### Cuhva cua nandoto ñiyivi i sihi

<sup>35</sup>Ta iyo ndo cua catyi ndo: ¿Yozo caa cua nandoto tucu ñiyivi i sihi? ¿Yozo caa cua nduu coño ñuhu ñu?

<sup>36</sup>Ma tondo xaan cuu ndo. Ñaa ñi maa sa tasi yo, ma caña si tatu ma tyahyu xihna coño si.

<sup>37</sup>Vatyí ña tuhva yo tasi tuñama, tasi yo nuñi. Ta tatu cuñi yo sa caña yoho ndutyí, cua tasi yo ndutyí. Maa siti ñi cuu sa tasi yo.

<sup>38</sup>Ta cua caña si cuhva cuñi ra Ndyoo vatyí ziiñ ziiñ cuhva caña sa ziiñ ziiñ siti.

<sup>39</sup>Ña inuu ñi caa tandihi coño ñuhu. Ziiñ caa coño ñuhu ñiyivi, ta ziiñ caa coño quití. Ta tucu caa coño zaa ta coño tyiyaca.

<sup>40</sup>Ta tucu caa sa iyo ityi ziqui sihin sa iyo nu ñuhu. Tyaqui xaan sa iyo ityi ziqui, ta tyaqui tucu sa iyo nu ñuhu, zoco tucu caa si.

<sup>41</sup>Ziiñ caa sa ndisi ñicandyí ta sa ndisi yoo, ta ziiñ tucu caa tiño. Ta ña inuu ñi caa tandihi tiño.

<sup>42</sup>Ta zuun ñi cuhva cuan cua cuu quivi nandoto yo vatyí cua ndu-ziiñ yo. Sa tyihi ñiyivi sisi ñuhu cuu coño ñuhu yo sa cua tyahyu, zoco sa cua nandoto cuu minoo sa ma tyahyu ta ma tiví.

<sup>43</sup>Coño ñuhu yo sa iyo vityí, yivi sa vaha xaan cuu si vatyí cua tyahyu si tatu quihvi si sisi ñuhu, zoco cuhva sa cua nandoto yo, yaha xaan tyaqui cua nduu yo. Ñahñi ca sa cuu zacuu coño ñuhu yo quivi quihvi si ñaña, zoco cua nandoto si sihin cuaha xaan cuhva.

<sup>44</sup>Coño ñuhu yo sa cuu cuenda ñuu ñiyivi ya, cua quihvi si sisi ñaña, zoco quivi cua nandoto si, yivi ca cuenda ñuu ñiyivi ya cua cuu si. Iyo coño ñuhu yo sa cuu cuenda ñuu ñiyivi ya, ta cua coo tucu inga si sa yivi cuenda ñuu ñiyivi ya zoco sa cuenda andivi. Ta yucuan cuu sa ma tivi.

<sup>45</sup>Catyi Tuhun Ndyoo: “Rayii sa sicoo sa xihna ñi, ra Adán, i sicoo coño ñuhu ra ta ndito añima ra”, zoco vaha ca ra Cristo vaty saha maa ra cuhva sii ñiyivi sa nandoto ñu.

<sup>46</sup>Sa xihna ñi iyo coño ñuhu yo. Sa cuenda ñuu ñiyivi ya cuu si. Cuae ca cua cuhva ra Ndyoo inga coño ñuhu sii yo sa cuu cuenda andivi.

<sup>47</sup>Tacuan cuu si vaty sa xihna ñi rayii i zavaha ra Ndyoo, ñuhu i cuu ra. Zoco sa cuu uu i quisi inga ra ndya andivi. Ta maa ra cuu ra ndyaca ñaha sii yo.

<sup>48</sup>Coño ñuhu maa yo cuu sa sino sihin ndyahyu tañi coño ñuhu ra Adán, ta tatu sino iñi yo sii ra Cristo cuee ca cua cuhva maa ra minoo coño ñuhu saa sii yo sa cua cundito andivi, ta cua cuu yo tañi maa ra.

<sup>49</sup>Vityi caa yo tañi caa rayii i sino sihin ndyahyu, ta cuee ca cua nduu yo tañi caa ra Cristo.

<sup>50</sup>Cuñi catyi sihin ndo hermanos, vaty ma cuu quihvi coño ñuhu yo nu ndyaca ñaha ra Ndyoo. Ma cuu quihvi minoo sa cua tivi nu ñahñi sa tivi iyo.

<sup>51</sup>Vityi cua nacatyi minoo tuhun xehe sihin ndo. Ña tandihi cuii yo

cua cuu, zoco cua nazama ra Ndyoo sii tandihi yo.

<sup>52</sup>Natahan si quivi, yaty xaan cua nacasi tahan tyiño; tañi tyehen ñi, tañi minoo tuhun zatahan nuu ñi cua cuu si. Sa xihna ñi cua coo nduzu cutu, ta ziqui cua nandoto ñiyivi i sihi. Cua zama ra Ndyoo cuhva iyo ñu, ta ma cuu ca ñu. Ta maa yo tatu ndito ca yo, cua zama tucu ra Ndyoo cuhva iyo yo.

<sup>53</sup>Vityi cuu tivi coño ñuhu yo, zoco cua zama ra Ndyoo sii yo minoo cuhva sa ma tivi ca yo.

<sup>54</sup>Vityi iyo coño ñuhu yo minoo cuhva sa cuu cuu si, zoco quivi cua nazama ra Ndyoo sii si, ta ma cuu ca si. Tacuan ta cua tahan si cuhva catyi si sisi Tuhun Ndyoo nu catyi si: “Zahacanaa ra Ndyoo sii tuhun sihi ñiyivi.”

<sup>55</sup>Ta catyi tucu Tuhun Ndyoo: “Cua zacaqui sii ndo sisi sa i sihi ndo, ta ma cuu cuii ndo. Ta ma zahacanaa ca tuhun sihi sii ñiyivi.”

<sup>56</sup>Sa saha cuhva sii tuhun sihi cuu cuaty yo. Ta catyi ley sahnu ñaa sa cuu cuaty yo.

<sup>57</sup>Zoco tyahvi ndyoo sii ra Ndyoo vaty saha ra cuhva sii maa yo, ta cuu zahacanaa yo sa cuenda ra Jesucristo, ra ndyaca ñaha sii yo.

<sup>58</sup>Yucuan cuenda, ndoho hermanos, ra sa ñoho xaan iñi, iin xaan cuu ndo sihin Tuhun Ndyoo. Coto ñaha cuiñi siyo ndo. Ñihi xaan zatyño ndo tyiño ra ndyaca ñaha sii yo vaty sa sito ndo vaty yivi sa caha ñi zatyño ndo tyiño ra. (Vaty cua coo quivi cua nandoto yo, ta cua cundyaa yo minoo nu tyaqui xaan sihin ra.)

**Cuhva cuñi si tyindyee yo sii  
inga hermano sihin xuhun**

**16** Vityi cua nacatyí sihin ndo cuhva cuñi si tyindyee ndo sii ñiyivi cuenda ra Ndyoo sihin xuhun. Zavaha ndo cuhva i nacatyí sihin sa ziin ziin ityi ra hermano nu cu si Galacia.

<sup>2</sup>Ma cuatu ndo ndya sa sei yucuan ta ziqui zatahan ndo xuhun. Tahan tahan tumbingu tava ziin ndo sa minoo minoo ndo ñaa sa cua cuhva ndo. Tatu cuaha ca zahacanaa ndo, cuaha ca cuhva ndo.

<sup>3</sup>Ta tatu sa sei yucuan, cua tasi yoo ra cuñi ndo ndya ñuu Jerusalén vatyí cundyaca ra xuhun cua cuhva ndo sihin carta ndo ndya nu yucu ra hermano yucuan.

<sup>4</sup>Ta tatu iyo tyiño sa cuhin yucuan, cua cuhun ra sihin.

**Nacatyí ra Pablo ndyamaa cua  
cahan ra Tuhun Ndyoo**

<sup>5</sup>Sa cuñi quisi nu yucu ndo, zoco xihna ca cua cuhin nu cu si Macedonia, ta yaha cuan ta cua sei nu yucu ndo.

<sup>6</sup>Ta tatu cuu, cua ndoi sihin maa ndo ndya yaha tyiemvu sa visi xaan. Ta cua tyindyee ndo sii, ta cua cuu ca cuhin ityi nuu ca ndya inga ñuu.

<sup>7</sup>Ña cuñi sa iin yaha ñi nu yucu ndo. Cuñi ndoi naha tatu cuhva maa ra Ndyoo.

<sup>8</sup>Zoco cua ndoi ihya ñuu Efeso ndya sa yaha vico Pentecostés.

<sup>9</sup>Cua ndoi vazú sahñi tahan xaan ñiyivi sihin, saha Tuhun Ndyoo ñuu ya vatyí iyo xaan cuhva sa cuu nacatyí Tuhun Ndyoo ihya.

<sup>10</sup>Tatu saa ra Timoteo nu yucu ndo, cuu ndo ñiyivi vaha sihin ra ta

tyindyee ndo sii ra ñaa sa cumañi sii ra vatyí zatyíño tucu maa ra tyiño ra Ndyoo tañi mi.

<sup>11</sup>Tyaa tandihí ndo yahvi sii ra, ta tasi ndo sii ra ihya sihin sa vaha quivi cua quisi ra nu ndyei vatyí ndati sii ra sihin inga ra hermano.

<sup>12</sup>Ta ra hermano Apolos, i zañiñi sii ra sa cuhun ra nu yucu ndo iin ñi sihin inga ra hermano, zoco ñá cuñi maa ra cuhun vityí. Zoco cua cuhun ra quivi nacuyatyí ra.

**Saha maa ra Pablo minoo nacumi  
sii tandihí ñu sino iñi ñuu Corinto**

<sup>13</sup>Coto ñáha cuzu ndo; coto ñáha zaña ndo cuhva sino iñi ndo. Zandyee xaan ndo iñi ndo, ta ma cuu ndo tañi sa ndyihí.

<sup>14</sup>Ñaa ñi maa sa zavaha ndo, zavaha ndo sii si sihin minoo cuhva zañaha si vatyí cuñi ndisa cuii ndo sii inga ñiyivi.

<sup>15</sup>Sito ndo sii ñiyivi ra Estéfanos vatyí xihna ca maa ñu i sino iñi Tuhun Ndyoo nu cu si Acaya, ta vityí zatyíño xaan ñu sa tyindyee ñu sii inga ñiyivi sino iñi.

<sup>16</sup>Ta zañiñi sii ndo, hermanos, vatyí tyaa ndo yahvi sii ñiyivi tañi maa ñu ta sii tandihí inga ñiyivi tyindyee sihin tyiño ra Ndyoo.

<sup>17</sup>Ziñ xaan cuñi vatyí i quisi ra Estéfanos, ra Fortunato ta ra Acaico vatyí cuu tyindyee ra sii ndi sa cuenda maa ndo vatyí ñá cuu quisi ndo.

<sup>18</sup>Saha xaan ra tundyee iñi sii, tañi saha ra sii maa ndo. Cuñi si sa tyaa xaan ndo yahvi sii ñiyivi tañi maa ra.

<sup>19</sup>Tasi tandihí ra hermano ityi Asia minoo nacumi sii ndo. Tacuan

tucu ra Aquila ta ña Priscila sihin tandihi ñu sino iñi, ñu titahan vehe ñu, zaquisi ñu minoo nacumi sii maa ndo sa cuenda ra Jesús.

<sup>20</sup>Tandihi cuii ra hermano tasi ra minoo nacumi sii maa ndo. Cuhva ndo minoo nacumi sii minoo ndo ta sii inga ndo.

<sup>21</sup>Ta ihya tyei yuhvi ra Pablo minoo nacumi sii ndo. Sihin ndaha mi tyei ihya.

<sup>22</sup>Tatu iyo ra ña cuñi sii ra Jesucristo, ra ndyaca ñaha sii yo, nacuhun ra cuan andyaya. Ta catyi mi: ¡Quisi tucun Jesús, quisi tucun!

<sup>23</sup>Ta cuñi sa cua cuhva xaan ra Jesucristo sa vaha sii ndo.

<sup>24</sup>Ta catyi sihin ndo vatyi cuñi xein sii ndo sa cuenda ra Cristo Jesús. Ta nacuu si tacuan.